

# Kanukinyo Imonyia? Kiner!

Jeffersonville, Indiana, U.S.A.

63-0714M

1 Kisirereng Ejakait yes! Kasalakisi ber aibwo apak edit, kwape kitulurio akwesiwok. Ejai kereka eipud edio loitegelikina? Arai ejai, kitejenaarai kwape ijaatar yes aikiar akaninikus mama ejai Edeke ido kobala, kanuka ngun, "Ejakait, ijeni Ijo eipudika."

2 Papa Lokokuju, kaitebeikin kirai isio itunga luisirerengitai atupuruc na, atukokina toma togo loka Edeke, kwape kijenia isio ebe ipu noi lu ti ekotosi ajaut toma togo loka Edeke atupuruc na, ido ejaasi toma adekisia ka oitadan luka ariebo. Kwabo kijaik Ijo sio arereng na ajaut kinga ne lolo. Ido mam isio kibunit, wu Ejakait, kanu aanyun ka yenice, karaida kimina isio eidicane kosi idiopet kayenice; konye ti isio kipedo aswam ngun koreria kosi. Konye kibunit isio ne kanu eidicane nepepe ka Ngol Lo atukoki isio nepepe kwape idwe luminan ka iinacan.

Kimalai isio Jo kwana. Ido epone bon lokijeni isio kanu kotenan eidicane kede Jo nges AkirotoKon. Akonikirot nges Abeit. Kitukokina isio ne adumun agogong nakomoyo. Kipuda isio ngin, wu Ejakait. Ibusakinit isio ajakut kede agogong tetere kipedori angirikin imusalaban lukibwokit isio. Ido kilipit isio ebe ibuni Ijo Aijukun Emoyo Lokalaunan ngol lokapolon lolo, ido ebuni aisicat isio kere. Kocam ipudesia luka itungaKon kwape atukokinotor kesi ido ikiaritosi akaninikec mamaKon, ebe ejai kesi eipud loka iboro kangul. Kobongok nginidiopet, Ejakait.

3 Kimalat isio Ijo kanuka ayuun aajar naka Inacikosi Ungren akuare nabian, kotoma akangas korot kane. Ibu Ijo kosianik kesi, Ejakait, ido kimalat isio Ijo kanuka ngun. Kosodi kwana kilipit isio, Papa Lokokuju, be ibuni Ijo aiyatakin ajakut kasio ka aingarakin da isio kwape kijaar alosit, kanginidiopet ka sio. Koinakinai isio apedoriKon naigangakinit ka aiyuun naka aijen ebe Ajakut Kon namam-etwaniari ebuni ajaut nepepe kasio. Kotoma osawa kangol lomam isio kipedoria aingarakin bon, kijeni isio ebe "idukuritosi Imalaikan luka Edeke airigaunit ngul lueminasi Ngesi, ido kidakete kesi oni kuju kinyek amoru kadiopak kere aiguiquin isio akeju." Ido kilipit isio kwana ebe ibuni Ijo ainakin isio nuka arerengusio Kon kanuka Akiroto, kosodi einer kamakosi, ido kotomakosi, Kokiror loka Yesu Kristo. Amen.

4 Eyalama eong ebe aica naka akolong nakokinga, amwanis naka akolong, euta aica. Arono noi atupuruc na. Ido aomit eong, kotoma akwap na, kanoinei, kijaar oni ka enyiko loepol noi, ekuse loka ikwamin loitapasuna. Ido aanyun akolong ecae, elomuni kinga, ejokuna nen noi.

Apak naka airiamun naka ekale lolo, eriamunos eong kede inacanaka, ido ejaasi kesi kuju laiye togo loka inacikosi, kede ice kotoma opajanakosi luko oibuga ka lueyapiete da. Ejai ekodet loepol loka lua Branham. Arai ti kesi kopotu kere ko Kentucky, aomit eong tikeraun isio aipagis eibuga lo; ipu noi kesi. Konye erai bon na abunore ore naedit. Kimina kolo isio airiamunun otogo loka toto, ido arai ngesi epir lomojong ngol-loemorikikinit isio nepepe, bala. Konye abu Edeke koyanga epir ngol-loemorikikinit ngol toma Akuj, ido amuno eong ebe kiponi isio airiamun kere ngina apaaran ace.

5 Kosodi kwana enerit eong kapaaran kaya, abala eong ebe, "Ijenete yesi, eyuunit eong ebe abuni eong-abuni eong aituurian aisiiranaretaka nuka Nasabiti aijesun kiton bala adakikan akaisaarei, ido-ido arai akaisauni, kasodi konyet ailipanakin lukadekak." Ido abu eong kaomoom ngun atupuruc na.

Ido abu eong kaomoom bian kuare, na enomakinia Inac Downing eong esimu kosodi atemar ebe, abu kinomak Billy ido kobala ebe ngesi kede Inac Ungren korotokec adokar kuju, kepotu kojurutaros korot ido apotu kikangasunos. Ido naringar Billy ejai odirisa, kanen, mam ajeni arai keraasi isawan idi ngul; acepak atupuruc na, kacepak. Abu eong kajotoor apak nape eyatakina. Abu eong kangolia kwap obuke Onac Wood, adungetosi akimian. Kasodi eong akukokin ailip, ido naeswamaunia eong ngun, kotema eong Icebore atiar, "Mam erono." Aso abu do eong kalimok Billy, "Kolimok ngin, 'Nginibore kere,' abu eong kaomoom, 'ebuni araut yen ejokuna.'" Eyalama noi eong aanyun kesi atupuruc na, ido kiboiete kotogo loka Ejakait, abongun ne akaulo na ajaut korot.

Itunga lueminasi jo netia nen, abunore kakwat nuka amairon kanu aiirar Akiroto Nukajokak, kasodi konyet eong aomoom, "Aisiiraret naka adakikan-akaisaarei, ido eong kwape eyapia kwape araar eong, mam do ngul epupunete ejok." Aso abu do kaomoom abuni cut eong...aojau naetia nen.

Aso konyet do, aiirar Onac Ungren, okooke kangin, atupuruc na eyoe, "Epone Loiraar Ijo Loipol." Ejaatar ngesi...erai Ngol lokapolou naiyatakina mamake atupuruc na itia nearaar sek bian paaran, naarai Edeke ngol loepol loka Akuj abu kidar totoke naminat, naketai nepepe ka inacike da.

6 Kwana, lolo, kimuno oni apak naejok noi kotoma Ejakait. Ido kijaar eong kede aiwadikaeta aarei arai auni nuegelegela nuabu eong kaseseni, ido mam eong abu, mam abu kapedo ajenun cut anibo kakesi abuni eong alimonokin atupuruc na. Adiopet kakesi arai, "Kowoik apod kon mama ejai Ngesi, naarai epodo Ngesi ijo. Kwana arai epodo Ngesi kanukinyo mam jo?"

Aso konyet bobo ace, Billy Paul, mere Billy Paul...Okooka loce je, Joseph, nges ainuni eong aiwadikaet na apak naeoj noi naatubor. Ajai ngesi iboie kagola kapaaran adiopet, kosodi ngesi atiar,

engoliari kuju asesen aputo ace, ido Billy...araiboot Joseph erai loemina atakerin, bala itelepai ludidik; atakerin ka ibalasin, ijenete yesi. Kosodi ngesi atemar eong atiar, "Papa, ejaatar Yesu kede ataker?"

Katema eong atiar, "Mam eong ajeni."

7 Aso konyet do akaulo ngesi anyoun kosodi alomar kinga, abu do kaomoom, "Ngesi ejaatar kede ataker?" Ido abu eong kalem akou nakirok kotoma kangun, kasodi bon aigirakin ngin kane koitaboka, "Yesu ajaatar ataker?" kasodi eong aomoom, "Neajaar Ngesi ne akwap, arai Ngesi ailipun akoik kanu auruunio kotoma, ates kanu aidaikinio toma, ataker kanu alimonokinia, konye erai Ngesi Eketekeran ameerin ngin namojong naka Zion." Cutibo, ejaatar Ngesi. Konye, kede aiwadikaeta ngun nuajai eong aomoomoi, kaomite ebe acepak abuni eong apedor alemun ngun konyet ekaulo, eringa isio kenyouno abongor.

Ijenete yesi, alelakinit eong ener kowema kane, naarai erai ekanisawok kikulepek. Kilacakina oni alimun kere nuebala Emoyo Lokalaunan. Kaiboisio nuce kwa, karaida ekoto etunganan ngol ijo kopup ebe isukunyunitai jo, ipupi ijo nepetai bala iridakina jo naarai ebe ijai jo okanisa loka itunganan ice, ido ikoto jo korai etunganan loiyapaara neilesikino kanu aiyong akec aomisio ka aisisianakin kec.

8 Abu kajaunotor ka esabiti loaumokina kobuke Onac Burcham kangina. Ido abu eong kalot toma acuuma na iswamaere cheese. Aanyunit eong ngesi ka aberuke, ka okooke ka kesi, ejaasi atupuruc na. Ido abu kaomite duc ebe ecuuma loiswamaere cheese.

Ti erai loeputosi ka aiboisio nuce nu ajaunun eong toma, oo, ti erai aiboisit nairedekid idokomodokok. Ikatuan, apedori eong alimun ibore idiopet, ipedori ijo aiyengun kojoni cut ebe mam erai aiboisit naimodokok. Kerai ngin aiboisit nakitelekaarit kotoma aila kakere kanu eiiritor eong alomar toma, ido kanoinoi, kotoma ocuuma. Ido mam eong abu kajenu. Abu eong kaomoom, "Oo, acepak epote kesi aiswamaun ilatirin akwatat luka cheese kotoma apaaran adiopet." Kwabo iswamaete kesi tons ikanyikape kanginipaaran, ido erai acuuman auni eratakinintai aswam. Kaomoom eong, "Oo, ikatuan, Ingai ber enyami cheese ngin kere?"

Konye esirereng Edeke etunganan lo . Abu eong kajaunotor karereng naka ajaun oreke, ere lokiminakininit noi, aberu naejok noi na einakina. Ido emamei akirot namam ibusakinitor kes aijar kanuka Kristo kanginipaaran, kwape iswamata kesi. Abu keriamunos kede odweke, ido eraasi kesi idwe luejokuka noi. Kiyalama isio noi kanuka eidicane kalo lokijaar oni idiopet kayenice.

Abu kadum ebe ekecokon kec losek kokau kerai etunganan lo ajeni eong, Onac Gurley, etunganan loejok noi loka aiyuun naka United Pentecostal, loabu kiriamuna keong kokaru kaluatuboros, Jonesboro, Arkansas. Ido mam abu kajeni ebe keraasi kesi...kerai ngol ekecokonike, keja ngun da.

9 Kwana kiitunitosi aijaanakineta atibong na. Kosodi konyet, arai kitojok Ejakait, Nasabiti bobo naebunit kimuno einer. Kosodi konyet aomit eong iburai eong alosit Chicago. Kanen do amameun ber eong adaun apak edit, iburai eong ayangar ekale ainyakar ore, ainyakar, araiboot ainyakar Arizona tetere kesi, idwe, epedorete aiwadikaun kosomero bobo. Ido konyet do kipalari isio aitapas ekecokon, ayanganar aijaanakineta keng.

Aso, kiyalama isio noi mama ejai Onac Neville kanuka aisukunyuke, ijenete yesi, naka anyaraun eong. Ido ikoni ngesi, mam...alelakinit eong, onac, etunganan loikoni nen, nemamei aitoronet, emamei aibitionut, erai Ekristayone lokabeit. Alelakinit eong ngun.

10 Kwana kilosi oni asiomun ewai ece loka Naiwadikatai kasodete konyet aitor nuibusakininit alimun. Ido mam cut eong ajeni apak nakilomaria oni kinga, kotoma Aisiiranareta nu nueojak, konye aomit eong...ajai eong enera apaaran ya nu adaun apak naeoj noi enera, ido abu itunganan ice kotema atiar, "Ee, kwana, arai ijo bon kiner adaun adakikan adis; kwabo inera jo kopone loka nukaiyeiyea, karaida biai," kobala, "isio-mam cut isio kipedori ajenun ngun." Kobala, "Kinyikokinite jo einer, kosodi konyet ekaulo elomuni ngin," nges abala ngol. Aso kacepak ekoto Ejakait oni aswam kopone kangol.

Kaluroto oni bobo.

11 Ejakait, eperi Akonikirot kotut epukoro, ido kijeni ebe kadiopepaaran eponio arapakin Nges kanuka apakiKe nakawasia, kanen do ebuni Akirot araun akuan. Kosodi konyet kiyalama isio kanuka apak kana atupuruc na. Ido kopuko mamakosi, kanuka EmoyoKon Lokalaunan, nuejaasi toma Akirot na nakilosi isio asiomun. Kisisianak Emoyo Lokalaunan isio lolo iboro ngul luibusakininit isio aijen. Ido karautu do isio, kotoma atacakin, lukipupokinit ejok noi Nginikirot, aipima Ngin kaidules. Kosodi konyet ngul luepupete koipone loka ateepu, kopupoto kesi ejok. Kapedosi isio aikamun ngun nuetamit Emoyo Lokalaunan apukokin isio. Naarai kijenu isio ebe, arai kinyonyoiki Ngesi isio, mam do ainyonyoikinio ngin erai natitai. Erai kanuka alosikinet, ebe tetere ngin iswamai nukajokak, mama ejai Ejakait. Ido koraut itauonokosi ka aijenekosi da luepukoro, Ejakait.

Kajaunos isio kalacakina na einer, ka alacakina da aiirar, kasodete adolokin aiyuun, aiyuun ngun

nuipou keirasi, kwape ebunitor ngin kama ka Akirot naka Edeke; tetere ngun acepak kimarakino mamakosi, Aijar naka Ikar Kere, kotoma apaaran ngin naepol na ebeit abunore. Kisirereng isio lolo. Kitoron isio ne ibucaritor isio. Kocamak isio kajenutu aibucanareta nukiijaar isio. Ido kisirereng isio korot ngol loedolit, tetere isio kijenuni erot bo ali ibusakinit aitor, ido epone lokiswamaet kotoma akwapin nukatinen kwana; tetere isio kiyangauni ayongio, kotoma aijarakosi kane, mama ejai Yesu Kristo, Loabu kotwana tetere ainakin isio Aijar kotoma nekapolon nen akaulo kane. Kilipit isio nu Kokiror loka Yesu. Amen.

12 Kwana akoto eong asiomun kotoma aiboisio aarei kotoma Nuiwadikatai, atupuruc na. Ido adiopet kakesi edumakinio toma Oitabo loka Anyoun. Kotoma abeit, kesi kere eraasi nuelemunitai kOitabo loka Anyoun. Adiopet, esula lo13, ido ekokoro lo 21 ka 22. Kosodi naetupakini erai esula lo 14, ikokoron lo10, lo11, ka lo12. Kwana asiomuni eong kotoma Anyoun 13:21

*Kingarenik Ejakait kes kepir loka edou paaran, aingarenikinit korot; ido kepir loka akim kuare acaikinit kes tetere elosete paaran ka kuare:*

*Mam abu kolema epir loka edou paaran, karaida epir loka akim kuare, kakonyen nuka itunga.*

Kwana kotoma Anyoun 14, ido ekokoro lo 10:

*Keapia Parao kiteluos idwe luka Isirael akonye, ido, koany, kokubokinos Imisirian kes; kokuriakaaros noi: komonyata idwe luka Isirael mama ejai Ejakait.*

*Kosodi konyet kotema...Musa, naarai kanen... (kitimoto ber eong).*

*Kobalas...Musa, Kanu emameatar atesin ko Misiri, nges kiyaulonia sio atwakikin amoding? Kanukinyo kiswamaikinia sio kwana, aitolomun isio ko Misiri?*

*Mere na nges akirot nakibala isio jo koMisiri, ebe, Kinyeinai isio kejaanakisi Imisirian? Naarai ejok aijaanakin Imisirian itia atwakikin amoding.*

Alosi eong asiomun ikokoron ice bobo:

*Kobala Musa itunga ebe, Sirikikuriakaros,...*

Kwana kopupokisi ejok

...Kobala Musa itunga ebe, Sirikikuriakaros, kobwaata kopalarito, koanyutu aitajar naka EJAKAIT, nakiswamakini...yes lolo: naarai Imisirian luanyunete lolo, mama bobo ianyunete kes ikar kere.

*Kijiiikini EJAKAIT yes, kililingete yesi da...Kobala EJAKAIT Musa ebe, Kanukinyo imonyia mama Ajai? Kolimok idwe luka Isirael kolototo kingaren:*

*Kitonyou jo ebelakon, korio akanikon angolol, kotiak nges; itorete idwe luka Isirael kiding kangolol neonit.*

*Ka eong da, koany etogogongi ituon luka Imisirian, edoete atupite kes: ido adumuni eong aibuses kaneejai Parao, ka ajoreke kere, kagalinike, kokebwanenokoke da.*

*Ejenunete Imisirian ebe arai eong EJAKAIT, nadumunia aibuses kaneejai Parao, kagalinike, kokebwanenokoke da.*

*Konyou emalaika loka Edeke loengarenikint ajore naka Isirael kobongo kaukec; konyou epir loka edou...koingarenikec, kobwo kokaukec:*

*Kobu kosipokin kiding ajore naka Imisirian ka Ajore naka Isirael;...koraun edou loka amuton neajasi kwi, kwabo abu koinak aica kuare neajaasi lu: Tetere idiope mam edolokini yenice akuare kere.*

*Korio Musa akekan angolol, kitukut EJAKAIT ekwam lokokide loegogong aitobongor angolol akuare kiya, kitarau angolol akwap naeonit, kotiakas akipi.*

*Kolomasi idwe luka Isirael kiding angolol neonit: kosubito akipi kamakec bala arwatat kakan nakoteten, kakan da nakokediany.*

*Kotupasi Imisirian kes akaulokec kiding kangolol, ibalasin kere luka Parao, ka agalinike ka ikebwanenokoke.*

*Kosodi kanen kotoma akwenyunet naka atupuruc kosesen EJAKAIT ajore naka Imisirian kotoma opir loka akim ka edou, kisiyalongong ajore naka Imisirian.*

Kisipok akokoron nuka agalinikec, kirengeata kolangirikinito: tape ebalas Imisirian ebe, Kakerata

kakonyen nuka Isirael; naarai itijie EJAKAIT Imisirian kanukec.

13 Erai Akirot naka Ejakait naepol noi, ejokuna noi, mam cut epone loipalaria aisiom Nges. Eraun cut Ngesi Aijar, kwape kisiomia oni Ngesi. Aomit eong, kotoma aiwadikaet kana atupuruc na, karaida ejakai aikam nges kotoma ateepeu, akoto eong alimun nu kotoma ageunet, edumuni ngin, adumun eong elopet bon. Ido akirot na eong...Bian, najaar eong toma aisisia, abu eong kadolu toma akirot na, ido abu eong kaomoom, "Alosi cut eong, arai kitojok Ejakait, einer nuka ngun, naarai isinyikoikinit ngin eong noi." Ido amuno eong kisinyikoikini oni kere, tetere oni kipedori aanyun, ido koinak oni asesen kuju: ka aisisia da nepetai kaiyatakina, kotoma aitiirian apaaran ngin kapakio kangun, e...toma apaaran naejai kwana.

14 Akoto eong ayangar akiro auni kanuka akou naka akirot, ido ngun kes: Kanukinyo Imonyia? Kiner! Abu Edeke kolimok Musa, kane kokokoro lo 15, "Kanukinyo imonyia jo mama Ajai? Kolimok itunga, ebe kolototo kesi kingaren." Ido: Kanukinyo Imonyia? Kiner!

Kwana, kijaar cut oni kakiro, ido abuni eong aitam aisunyakini kwape katipet kwape epedoror, kwape ingarenikini Emoyo Lokalaunan. Ido akoto eong aomoom nuka a...nuka aiwadikaet kana, nuka Musa emonyi mama Ajai Edeke, kotoma apak naka ationis; ido Edeke aitoron Musa, korai cut kotoma apak najaar ationis eunya. Ido erai cut esube, esubit bala, kanuka etunganan aimony. Ido konyet kanen-aitoronet ngin kanuka Edeke aibelokin kosodi aitoron ngol kanuka alimun ngun, kanuka aimony mama ejai Ngesi. Etakani ngin bala erai ibore yen etiono noi.

15 Irwan ipu, nakisesenia oni Nuiwadikatai Obaibuli, kopone wok losesenet, esubit bala etiono noi. Konye arai kisisia oni ngun adaun apak, kidumuni oni ebe Edeke ngol lokacoa-kere ejeni cut nuejai Ngesi aswam. Ido ejeni Ngesi epone lokiswamaet iboro lu ido ejeni epone loiswamanarotor kede etunganan. Ejeni Ngesi ibore yenejai toma naka etunganan. Ejeni Ngesi ngol. Mam oni. Kijeni bon oni kowai loka adam. Ejeni Ngesi ibore cuticut ejai toma naka etunganan.

Aponi kouruunai Musa kotoma akwap na, ido arai etelepat loaajaatar ka ainakinet. Aponi kouruunai ngesi araut enabi, ekayuunan. Aponi kouruunai ngesi kojaatar ka iboro lukitwasama euruunitai kotomake, kwape kangolitunganan loebuni toma akwap euruunio nepepe kiswamaeta lu, kwape eyuunitor eong kagogong noi aijen nasek naka Edeke, ainerunet ngin nasek.

16 "Mere ebe ekoto Edeke idiotunganan komudiar, konye kere ti kodolokisi toma aitoronikin." Konye, kanu araut Edeke, kiburai Ngesi ti kojoni, ido ejeni, "awasia ameun kageunet." Ianyutu? Arai mam Ngesi ejeni, apolouke mam Ngesi erai loemamei esange; ido arai mam Ngesi erai loemamei esange, mam do Ngesi erai Edeke. Aso mam Ngesi arai loakoto, cuticut bo, ebe komudiar idiotunganan, Konye Ngesi ajeni ingai abuni amudiar ido ingai mam abuni amudiar. Erai kanuka ngun, alosikinet alopet naabunio Yesu toma akwap, kerai kanu aitajar ngul luabu Edeke, kotoma aijeneKe nasek, koanyunite ebe akotosi aitajario, teijo, naarai akwap kere etelekarito akiro. Ido mam eong apedorit aanyun epone lotikipedia oni aisisianakin ngin kopone ece itia araut aijen nasek naka Edeke, ido itacaunit Ebaibuli inera ebe ejeni Ngol awasia ameun kageunet, ido epedorit ajenun ngun.

Kanukangun, naetamitor itunganan araut ibore yenimam kes eraasi, eraasi bon kesi luisamaete aituputooro, ido katipet noi arai kokau konyet engicuni ngin jo. Kidumunete adianaretakon ijo. Mam jo ipedori arapit kes. Ejai arapet adiopet bon kanuka adiakar, nges Aokot nuka Yesu Kristo, ido mam epedorio aitwasam Ngun arai mam Edeke kinyaraunit ijo ameun kapetetait naka akwap. Erai kanuka ngun nges abukorere Aokot ngun; mere aipudapud, ka akienar, ka aicumucum, ka ener nukaronok kanukec, ka ace da kwangin. Keraasi ngun kanuka alosikinet na etebeikinitai. Erai ngin nakabeit. Mere aboliar, mere aituput, kanu atemar ebe erapitai adianaretake komam. Ido emame etunganan loepedorio airap adianaretake arai mam ekekiror kerai lokibwaikinitai toma Oitabo loka Aijar loka Imerekek eringa kepesikina apetetait naka akwap. Yesu Elopel abala, "Emamei itunganan ebuni mamaKa arai mam PapaKa iriunit nges. Ido kere lu adau Papa," erai naedaunitai sek, "ainakin Eong, epote mamaKa." Erai ngin nakabeit. Aso mam jo ipedori aitaraun Akiro ngun nukaingal. Ejaasi kesi nen kanuka Abeit ido kanu aitetenia.

17 Ido aponi kouruunai Musa kede ainakinet naka aiyuun; aiyuun naepol kejaatar Musa. Kianyuni oni ngin, akaulo apak naedit, elomuni kotomake. Ido aponi kouruunai ngesi kotoma okale loepol, kwape kijenia oni epone loapotu papake ka totoke, ido alomunitosi kokale loka Lebi. Lo da, akirot kane, sek ber eringa kedoluno nu, kotoma Oitabo loka Anyoun, ijaikinit kaibusen noi aijar naka etunganan kalo. Ido kerai ngesi ediopet kotunga lu lukapolok kakere kotoma Obaibuli, naarai kerai ngesi cuticut aitupuset naka Ejakait Yesu.

Aponi ngesi kouruunai kotoma aurio naetegelikina noi, bala Ejakait Yesu. Aponi ngesi kouruunai kotoma apak naka areo, bala Ejakait Yesu. Aponi kouruunai ngesi araut ekayuunan, bala Ejakait Yesu. Apotu ikauriakake kibwaata ngesi, aisukunyaar kama ajai lokasurup, bala Ejakait Yesu. Kerai ngesi ekengarenon, bala Ejakait Yesu. Ido arai nges ekainakinan-ikisila, bala Ejakait Yesu.

Ido kidumuni oni ebe abu ngesi kotwana kAtiiba, ido iburai kebu ngesi kejaru bobo ka nginibore,

naarai ikar akwat akanyikauni ekaulo abwoi ngesi ko Moru Lokaijulakinio, inerasi ka Ejakait Yesu. Teijo? Apotu Imalaikan kodakasi ngesi ayangaar. Emamei idiotunganan yenejeni ne aponi kidaikinai ngesi. Karaida ber ajokit mam ajeni ngin. Einer eitena, mam eong eyuunit ebe aponi kidaai ngesi. Eong-eyuunit eong ebe abu Edeke kodaka ngol ayangar, ido abu ngesi kotwanik Atiiba ngin naabu ngesi kotupite apaarasia kere nuka aijarake.

Ido arai ngesi aitupuset naitekooro naka Kristo. Arai ngesi ekabaka loayait itunga. Arai nges ekainakinan-ikisila. Arai ngesi ekedaran loka itunga. Kerai ngesi nginibore kere, kotoma aitupuset, na arai Kristo.

18 Kwana, do, koany ebe aponi ngesi kouruunai nepepe kainakineta nu nuepolok ido kajokis naajai tomake, konyet do abu koyangaik icebore ainwakakin ngun, kanu ayangaun ibore ngin toma Aijar.

Koany, ikinyomit yenika Edeke erai kaitebeikin cut yen ibwaikinitai tomawok ameun kapetetait naka akwap. Ido naecakinia Aica ngin ikinyomit ngin irwan nasodit, Eyangauni ngin toma Aijar, konye ibusakinit ber Aica ngin adolokin ikinyomit ngin.

Bala kwa alimonokinitor eong irwan ipu nuka aberu kangin katan, kojai ngin ojautene kwa kangol. Karaida kerai ngin itunganan yen ajenaara-kanuarokok, karaida arai akeijar namunaara, ido ajai ngesi ojautene kwa kangol naarai mam cut inonosio atiriritosi ngesi, konye, keja ngun da, na irwan nasodit abu Aica ngin kotiroria ngesi, katipet noi abu ngesi kojien Ngin, naarai kejai ibore nen kanu apurokinia Ngin. "Naiwororia aidules mama ejai Aidules," ibusakinit kojai Aidules nenice kanu apurokin aiworotoi ngin.

Ido Musa kane auruunitai enabi lo, konye etopolounitai ngesi kosomero lokacoa naka akuan ido kotogo loka Parao loka akabakanut. Parao ngol Seti, lo etopolounere ngesi kokwapuke, arai etunganan lo aroko ejaatar kayongio, ido eyuunit Yosep araut enabi loka Ejakait. Konye kanen kobuni Rameses akaulo naka Seti, ido mam Rameses apodo nuka Yosep. Ido aso, kanuka ngun do, nen nges ageunia ationis, kwana, naanyounio Parao lomam ajeni Yosep.

Konye adoketa nukajokis nu nukapolok, kenerata ber oni nukec kanu apak naedit, ido, eringa oni kedolokino toma ewai lokapolon loka akirot kana, konyet do adukokin tomake, ido kingarak Ejakait oni atupuruc na kwape kidukio mamake.

19 Musa, araut loaponi kouruunai kede ainakineta na naepol naka aiyuun. Konyet do, aponi kinyonyoikinai ngesi kosodete aiyakiar kokiota loanoki, alosit alakun itunga luka Edeke. Kwana koany ber jo adoketa nukajokis nukapolok nukajaatar etunganan lo! Auruunitai ngesi kanuka ibore mutan. Kejaatar Edeke kede alosikinet kotoma kangun.

Ejaatar Edeke kede alosikinet naka ajakutukon ne. Iany? Karai bon ijo korai, kodol toma aiboisit ngin, epone loeraar naepol noi ationis na ilemari jo kama ejai Edeke ido kamakon, da.

Aponi Musa kouruunai, kosodete konyet ngesi, ekaulo, aponi ngesi koyangaunai a-a aibois naponi kinyonyoikinere ngesi. Ido, koany, ikinyomit ajai eperi kanen kede apotuunio naka acoa nakakuan, nepepe kaiyuun ngin kere ebe auruunitai ngesi kanu alakun itunga lu, konye ca mam cut ngin abu kobu toma Aijar aitodol Aica ngin kama kokiota loanokie aimiliaikin ngin; kiton nges aanyun, mere ibore yenasomit ngesi nukeng, konye ibore yen abu ngesi koany kakekonye; Ibore yen abu kiner mamake, kosodi ngesi da ener mama kaNgin. Oo, epone loabu ngin koinakinia iboro Aijar!

20 Aomit eong etunganan edio kere kede a...arai aberu, esapat arai apese. Ido aomit eong, kotoma apotuunio naka acobeu naka ngun nu eomitosi kesi ebe erai Akirot, ka ace da kwangin, mam cut epedorete aitobwo apetetait naileleba aitodol nairiamunotor kesi kede Aica ngin naeyauni Akirot ngin araun ibore ilopet.

Aomit eong ebe emame ekanisa kotoma aitetemonor ke, mam akiro arai etia ngol ai erai lokacoa nakakun ka araut da loka nugeunet, mam ekanisa ngol epedori apolo aitodol naitejenunere Nukapedor nakomoyo kokiding naka itunga kangul, ido kosodete ngul aanyun ngun. Ibore ice yenedorete kesi ener mamakeng, ngin yenebongokini ener mamakec, yenitogogongit Akirot naiwadikatai kwape nakabeit.

21 Kwana kiitutu, naeriamunotor Musa kede ekiota loanokie, aponi Akirot ngin kitogogongoi cuticut kwape nakabeit. Kerai ngin Akirot. Mam Musa ebusakinit aiyalongongo, "Anyoika ber nuikamunito Eporoto lo? Enyoin bo Lokajaran lo kane?" Naarai adaunit sek Edeke aiwadikate ngun toma Nuiwadikatai, kotoma Ageun, ebe "Epote ikonitunga araun ipejok kakwap namere nakec, konye eponio kes ainyakun akaulo na ikar akwataongon, ebongunete bobo toma akwap na, naarai epali loka Imoraitin eroko edolo." Kwana, akwat ka akwat nuka ikar eringa, adaunit Edeke alimun ebe abuni Isirael araut apejonon ido aponio areit kesi kakwap namere nakec, ido apote aiboi kangina adaun ikar akwataongon. Konye Edeke, kede akan nakagogong, abuni aitolomun kesi kinga. Aso, koany jo, nepepe kekiota loanoki...

Ajeni Musa nu, kocoa naka akuan. Ido ikinyomit ngin yen auruunitai kotomake, ajai eperi kotoma otauke. Ido abu ngesi kotam, kotoma aijeneke nakakuan nepepe ka Akirot, aitam aitolomun kesi kinga,

alakun kesi, naarai ajeni ngesi ebe euruunitai ngesi kanuka alosikinet kangin. Ajeni ngesi ebe, apak. Nuiwadikatai kere abalasi ebe adaunitosi kesi ajakut ngina adaun ikar akwataongon.

Cut kwape kijenia oni kwana, kwape abu etunganan kengisitor eong adakikan adis kokau, kanuka Abunore ka Aurupoorio. Kijeni oni. Kidau oni aijar kiton apak adaun, apak naka Aurupoorio aapu, ido kijai oni amoote aiyuun naka aurupoorio ngin naepedori airiun Ekanisa nepepe kosodi ainakin Nges agogong nakomoyo, naepedori aijulakin awate nu nukijari oni kotoma. Nakianyunia oni Edeke loepedori aitajarun itunganan aitonyoun kokwap araiboot kalero, kosodi ainyakun ngol toma aijar bobo ka aijaikin da ngol mamawok, nakianyunia oni Edeke loepedori alemar engoti loenyamit etunganan kiton adokoror cut kosodi aitonyoun ngol erai etunganan loegogong kongalei, ibusakinit ngun ti koinakis aiyuun naka aurupoorio mama ejaasi itunga. Ebe, naimiliauna Aica ngin kokuju, kosodi arupepe aruikin, ebuni Akuan naka Kristo atukokin nepepe katipet, kosodete aijulakin katipet ka ayangaar da toma Akuj. Eebo, ibusakinit kojaun ibore kwa kangin atakanun. Ido mam isomeroi wok luka aisisia nuka Ebaibuli epedorete aiswamaun ngun, konyeca kotoma aijen naka akuan edolitos kesi kere. Konye iburai ijo airiamun kede Aica ngin! Ibusakinit jo adumun Ibore mutan ngin.

22 Ido kane abu Musa, kopesik anyaraunio ke ngin naapol mama ejai Akirot, ido arai naepol, kiton apaaran adiopet abu ngesi kiriamunos ka Aica na, ido abu Akirot Alopel cut obe kiner mamake. Kanen do kodumuni ngesi ainyonyoikinioke. Naabu kinyonyoik ngun nuajaatar ngesi kotomake, ngun nuajaasi toma, nukaijen ngun nueyuunitos ngun, aiyuun ngin na apesikinitai toma aiyuunit keng Edeke, naabu kotiaku ngesi kama ejai totoke. Kosodi kwana do naketiroria ngesi kotoma Ajakut naka Aica kana, abu Ngin kinyonyoik ngun nueyuunit ngesi. Iany? Ainyonyoikinio bo lolo nanyoin! Ido aponi kiyakiarai ngesi.

Kwana, kijeni oni, kacobeu ebe abu ngesi kiirarite totoke. Ajeni ngesi nuapote aiswamaun, ido ajeni ngesi ebe ajari ngesi kotoma apaaran kangin. Konye kane abu ngesi kodum ebe abu kokurwok ngesi, aso katicepak abu ngesi kojaunotor ka...abu akeiyuun kodoio ber motimot. Konye do naabunio ngesi okiot, abu Edeke kotema atiar, "Eira Eong aimony naka iKatunga, ido eitu Eong aisumuneteKa mama ejaasi lukapapakec, Aburaam, Isaak, ka Yakob, ido abu Eong kwap." "Eong," kanen, itunganan ngin ilopet, "Abu Eong kwap alakun kes."

23 Kosodi kwana mere ber eong keyatak nu arai ngin...Kisioni Edeke eong arai esubit na bala amamus aitalaunit. "Mam Eong eswamai kakwap, kilema bon kotoma otunganan. Arai Eong Emusabibu; yesi kes atenun. Ido alimor Eong naadumunia Eong itunganan. Ido adau Eong aseun jo, ido keyakiari kwana Eong jo kwap ngina alosit aitolomun kesi kinga." Ianyutu? Kwana koany, "Abuni Eong ajaun ka akitukukon, ido Eong...koting jo ebela lo."

Kosodi Musa atemar atiar, "Apedori tope eong aanyun aitogogonget adio tetere eong ajenuni ebe iyakiarit teni Ijo eong, ido ebe inyonyoikinit Jo eong, kosodi da ebe ibuni Jo aswam iboro lu?

Kobala, "Inyo bo ngin ejai akanikon?"

Kotema ngesi, "Ebela."

Kobala, "Kocakak ngol kwap." Abu koluor emun. Koutokin do ngesi akerit.

Kotema Ngesi atiar, "Kikam nges." Abu ngol koraun ebela. Kotema atiar, "Kibwaik akonikan atorobukon." Abu kalem ngin kinga, ido koany kerai atapon. Abu kinyakak ngin, ido keponi kitangaleun.

24 Abu ngesi koany aibuses naka Edeke. Amamei aingiset bobo, mama ajai Musa. Ibu tope jo koany, mam cut ngesi abu koker moding bobo? Abu ngesi kojenu ebe aponi kinyonyoikina ngesi. Abu ngesi kojenu ne, iboro lu kere lu lem ajaasi toma otauke, adoketa nukajokis nu nukapolok, ido ngesi...araasi kwana do nuenyonyoikinitai. Ngesi ejai ekapakina. Ekapakina ngesi alosit. Aso kijesar do ngesi abear Misiri.

Kobala Edeke, "Kijaun Eong kajo," abu ngin kitemok ngun. Arai, "Abuni Eong ajaun kajo," ngun bon kes kibusakinit Musa aijen. Kanuka anyarit na nakotauke naepol, kwana da abala Edeke, "Abuni Eong ajaun kajo."

Kwana, abu da bobo Edeke kitogogong ake...alimoreta nuka Musa. Alimoret naka Musa, "Kipou eong keriamunos ka Ejakait. Ido abu kolimok eong alimokin yes ebe, 'AJAI KWAPE AJAAR' nges keyakiunit eong." Ianyutu?

Kwana kobalasi kesi, "Etunganan lo kane, Eyudayat ece bobo, acepak ice kotoma luilamara kalu lu aponenete ne apak kere kede iponesio luegelegela luka aitemonokineta nuka alakun oni kotoma obulesene." Ido ijenete bo yesi epone loejaatar itunga naeraatar kesi ibulesin, arai ejaasi toma obulesene kanuka icebore, ejai duc acoa naka aingal naebuni, ijenete bo yesi, kanu aiswamaunia ngun.

25 Aso, Musa, abu Edeke kisumun Musa, "Abuni Eong ajaun kajo. Abuni Eong ajaun tomakon. Akakiro epote araun Akonikiro. Kiner jo Akakiro ido kolim bon ngun nuabala Eong."

Kwana do naalosio Musa kwap ngina kosodi alimokin kes anyaraunio na, kosodi aibwo kakonyen nuka Parao, ka alimokin da ngol ebe, "Ejakait Edeke loka Iburanian, nges abala, 'Kitolom idwe ngul kinga,'" ido mam ngol akoto acamakin ngul anyoun alosit, abu ngesi kiswama aanyunet kakonye nuka imakio ido kakonye nuka Parao. Ido aanyuneta ngun nuabu Edeke kiswama: Kotema ngesi, "Kwana, moi, bala kapak kanapekana ebuni akolong aiwar, ebuni araun amuton

26 ko Misiri kere," ido apotu ngun kitodolikinios becebec. Kosodi konyet ngesi atiar, "Epote-eponitos icuc toma akwap," ido abu ngesi korio ekebela kosodi anyaraun icuc, ido apotu icuc kopotu. Ido abu ngesi kodwar, ido nginibore kere yen abu ngesi kodwar abu kotakanu cut becebec kopone ngol. Kerai Edeke. Ianyu?

Kebu Edeke konyarau ngesi ageun kaurio keng, kosodi aibwaikin adoketa nukajokis tomake, nuka aiyuun naepol, kosodi konyet abunore kwap kede AjakutuKe ainyonyoikin ibore mutan yenapol ngin yenajai tomake, kosodi aiyakiar ngesi nepepe kAkirotoKe, ido arai ngesi loetodiaritai ejok noi kwape lokabeit loka alimoretake. Mam apod arai imwasi ai lukaingal luapotu kodakunos, arai imwasi ai iboro luce lu luapotu kotakanut, Ajai Edeke inera mama...Arai Musa loetijenaaritai. Musa, nuabala Musa, abu Edeke kijaik angosibib. Mam eong akoto yes kimurwok Akirot ngin. Nualimuni Musa abu Edeke kijaik angosibib, naarai ajai Akirot naka Edeke toma Musa. "Ajaunos Eong ka akitukukon; ebuni ener iboro luedolito." Kwana, nuelimuni Edeke-nuelimuni Edeke, inera Ngol ngun kotoma Musa, ido abu ngin kitogogong ka aitodiar da alimoretake kwape nukabeit.

27 Bobo da, abu totoke kolimokinite ngesi, nuka aurioke na ationo aitetem, ido ebe apak ngin keapie esawa lo abeitor alakunio ajaun. Amram ka-ka Yokobed, odwe ka akoku naka Lebi, apotu kogeutu ailip mama ejai Edeke aijukun ekalakunan. Ido abu koyangaik...naiwanyunia jo apak naka aisumunet eapuni, ijaikini ngin itunga ailip ka aimuit. Ido komam abunonokin ebe abu Yokobed kolimonokinite ngesi irwan ipu, totoke; kwape araar ngin aketuutuoronike, da, kwape kijenia oni akiro ngun. Ido kebu kolimokinite ngol epone lokilipitor ngesi. "Ido, Musa, nauruunere jo, okoku, irai jo ikoku yenikajokan. Ibu jo korai loitegelikina. Ajai ibore yenabu kiswamaun kapak na edounere jo."

Abu kejaikinite e drama loka ngun kanuka idwe, mam etuboro apak naepol, ido abala eong, "Najaar Amram agola ailip, abu ngesi koany Emalaika eutuni eKekileng kosodi adodiar Agolitomei, ido kobala, 'Ibuni jo ajaun ka ikoku, ido ebuni ngol ayangaar idwe Agolitomei toma akwap naka aisumunet.'" Aijaikin e drama mama ejaasi ikesa ludidik tetere emisiiikinite ngun; mam ber aoomoo kec edolit adoketaitikus yes luipolokoto, ido ipedorete aikamun iboro kwape epukokinia Emoyo Lokalaunan ngun mamakus.

28 Kwana, karaida abu totoke kolimokinite ngesi iboro lu, ido ajeni ngesi nu, konyeca epuda ngesi atirorio ace. Aisisianakinio arai na ajokuna, konye epuda ngesi airiamun keng kelopet.

Ngin nges na ipuda akwap lolo. Ngin nges na ipuda ekanisa lolo. Ngin nges na ipuda nginitunganan lolo, lu eraas odwe ka adwe nuka Edeke. Tetere araun ngun, ipuda jo airiamun na ijo ilopet, teijo, Ibore mutan. Mam akiro, ijeni ebe erai Akirot nakabeit, ijeni jo ebe erai Ngin naedolit; konye do naetiroria, kosodi konyet aanyun ibore ngin iswamao, kojenu do jo ebe ijai jo orot lokabeit. Ianyu? Ido, koany, ebuni duc araut Nuiwadikatai. Ebuni ngin aibwo cut nepepe ka Naiwadikatai, naarai abu na.

Ailip naka Amram arai cuticut na aupasi kede Naiwadikatai. Ailipasinei kec aupasi kede Akirot naesumunitai. Abu Edeke kisumun kapak kangin aswam ngun. Apotu kesi kilipata kanuka ngin, ido kane kouruunete ikoku yenikajokan. Kosodete kesi...

29 Koany! Oo, epone lo aminar eong na! Teijo, kotoma osawa loajaar Parao aiyar idwe kere, teijo, aijaikin ngul toma okileng, ekileng loka ikedarak; apotu kesi kicumucumata idwe lu aiyar, kitaniata ngul akinyanga, iwate ngul ludidik, aitodol na acepak apotu akinyanga kotumiata kanuka awate nuka idwe luka Iburanian. Konye abala Ebaibuli, ebe, "Mam ikauriak apotu kokuriakata aicorakinet naka Parao aiyar idwe." Mam kesi akuriaka. Mam kesi akuriaka naarai kepotu kesi koanyunitos ibore kotoma ikoku kayen, ageunia ber. Apotu kesi koanyutu ngun, ebe kerai na abongokinet naka ailip.

Kwana kereka ajaatar Musa ka nu kere kwape nugeunet, aso ajeni Musa ebe eyakiunitai ngesi kanuka alosikinit alopet obe alakun idwe luka Isirael.

Koany, nugeunet kere eutasi cut acular. Naidumunia ijo idiobore, ido kopedori ayaun Ebaibuli, kobala, "Elosete *nu* atakanun," kosodi kane kotakanunete ngun; "ido elosete *nu* atakanun kapak kangin," kane kotakanunete ngun; "elosete *nu* atakanun kapak mutan ngin," kanen kotakanunete; konyet do iculakinios ngun nepepe kosodete ainomun aputo kanuwok.

30 Oo, epone ti ewema lo atupuruc na, epone ti oni itunga luka esawa kalo, Onac Neville, kwape kisesenia akoruo elomunete kotimawok, ka ikeperin wok da eutasi ainiaun, naianyunia oni akwapin edonyosi ka aijangijanga kwape ejaatar ngun, ido epone lokipedoria oni angolengol kasodete aanyun ebe aapu aisumunet! Erai ngin, ngin...aomit eong, irwan ipu, arai bon kopedori itunganan aibelokin toma kaNgin katipet noi, gwai ti, kosodi abunore toma kaNgin katipet noi, ti nepetai kijuka jo Aijar naIkar kere ,

cut kede ibore yeneurupoori kwa kangin! Ido komam ijenuni ngun, ido bon, oo, abelakin toma oboro lukianyuitor oni ido kajenete ka amisiikin da, kasodete kere aibelokin toma kapak adiopet. Etunganan, arai aberu, etelepat, arai apese, ti katicepak kikiasi akaninikec kosodete atemar atiar, "Kalototo, wu Ejakait yesu," teijo. Oo, epone lo eapiar esawa!

31 Musa kwape ajenia ebe aurunitai ngesi kanuka alosikinet kangin, kosodi angoliar kinga kodirisan ka asesen da Iburanian ngul kwape etaaritotor; abu kongolek kau ne kotoma Kanuiwadikatai, ido abala ngin, "Ido epote adaun ikar akwat aongon ," teijo, "konye abuni Eong ainyakun kesi kede akan nakagogong." Konyet do na ebongunio ngesi, akaulo naka aiyakio, kinyonyoikinitete, kojoni ebe aurunitai ngesi...Ido abu aiyuunike koseseni, kanuka aiyuun abu koany itunga ngul ido kojoni ebe eraas idwe luka Edeke, naarai akwap...abala Akirot kwangin. Mam kes araasi lukakwap, ido mam aputosi kaluce kotomakec. Araas kesi luetegelikina. Ido araasi kesi ibangiok ka luilamara, mama ejai amwekimwek naekiara naka Misiri; ido abeit ngesi araut okoku loka Parao, aikamar ajakanut ngin, ido loatupakinit. Konye, ngesi, ajai ibore yenajai tomake cut, aiyuun nateni namam abu kosesen iboro ngul, amwekimwek ngin nabeit ti ngesi airumun. Abu ngesi kosesen aisumunet naka Edeke, ido ajeni ngesi ebe aapie apak. Ido iboro luibusakinit abu etunganan ngol koomoom!

32 Akoto eong ener ngun kede ngesi, apaaran ace, neriamunotor eong kanges kowai kaje. Itemari jo atiar, "Aijangakina ngin, onac!" Mam, mam erai. Alosi eong airiamun ka ngol, kanuka asianut naka Edeke. Eebo, ipa. Abuni eong ainerakin kede ngol, apaaran ace, Musa elopet. Ido epone loimuitor eong aingit ngol, bon epone, nakeanyunuia ngesi aisikapikinio keng!

Epone loajaar amaran, ebalajokit, "Aibo, mam itunga epote aiyuun jo. Huh-uh. Nen- emamei ibore kanen."

33 Konye naabunio ikinyomit ngin neejai Aijar kalaije, abu icebore kinom ngesi, ido abu ngesi kojenu ebe ajai ibore abuni aiswamaun. Ajeni ngesi. Abu kongolek-esawa kosodi aanyun nanyoin apak kerai ngin, ido abu ngesi kojoni, ido epone lo katicepak aoomoma ngesi kwape asesenia. Kwana naadumunia ngesi nu kere nepepe, ibore yenepol yenikeanyunit ngesi yen; apak naka Naiwadikatai, ailip naka totoke ka papake, ido auritai ngesi kaurio naetegelikina, ikoku yenetegelikina. Ido, erot kere, ajai ibore ajai tomake cut.

Ido kwana abu ngesi kocietar awai kosodi aitam aoomoom ebe abuni ngesi aitwasam aituutuorioke naka ajore kosomeroke, kosodi alakunia idwe ngul, ido abu komen ngun

Kolosi do ngesi adokar amoding kosodi adukokin apese naesimai naka Etiopia, ido apotu kodumutu ikoku ekekiror Geresom.

Ido kapaaran adiopet najaar icokiei esipan, atipet ngipengin abu koany ekiot kokuju naka emoru, enoki. Ido abu ngesi kodoka kuu nen. Kwabo mere yencobe, mere ainomaret, mere aingalakinete, aingalakinete naka aica, konye kotomake...Ajai Edeke loka Aburaam, kotoma Aica, Epir loka Akim kokau kotoma okiot, Akim ngin, bala akailan elomuni kinga, konye mam etapasi ekiot ngol. Kosodi Eporoto loka Nuiwadikatai, Eporoto loka Edeke, ener kotoma kanen, ido kobala, "Aseu Eong jo. Ijo nges etunganan ngol. Abu Eong ketopolou jo kanuka alosikinet kana. Ajai Eong aitogogongikin jo kane, kanuka aanyuneta, ilosi jo aijesar alakun idwe naarai ibusakinit AkirotoKa kitodolikinai."

Oo, AkirotoKe naka apaaran kana ibusakinit aitodolikinio. Mam ace nuelimuni idiotunganan ice, ejai Akirot aitodolikinio. Akuj kede kwap edaunos, konye mere AkirotoKe.

34 Kwana, natukokinia Musa nu kere nepepe, kosodi aanyun kotoma nginikan, abu kinyonyoik aiyuunike. Amen! Oo, ikatunga! Aomisioit bo lolo naikoniai na! Na, itunganan, ilopet aanyun Nuiwadikatai edodit cut nukerai ngin, kosodi ener loka Edeke, kosodi aitogogonget naka ngin kanen, abu kinyonyoik aiyuun nakejaatar ngesi kotomake, alosit aswam.

Anyoika kereka ibusakinitos ngun ti aiswamaikin oni? Kipuda oni aitoronikin. Kipuda oni aisikwarunio. Abala eong elopet. Ianyu? Epuda eong aijangakinio. Epuda eong ibore. Abala eong ebe ajai eong ener mamaka kelopet atupuruc na, arai nuikamunito eong elopet. Epuda eong aitwekenyunio.

Ido kaomoom eong nuka aitogogonget ngin naepol, nginibore iperikinitai ejok noi kanen, ido abu ngin kinyonyoikis aiyuun naka Musa. Ido, ikatunga, abu ngesi koany ebe amamei ibore...

35 Kane, abu ngesi koker anyoun ko Misiri, kede, kaitebeikin, ti ngesi epedorit aitegear amumu arai icebore, ido ti ngesi kepedo aikeun kosodi aitegear amumu ko Misiri, ido tikepedo ayangaar ajore kosodi ejie, konye, teijo, ido ajaatar ka ilukumin luipu kowaike. Konye aibois naka ngun, akuriana ngesi karaida ber aswam ngun, kede ajoresio ejaasi owaike.

Konye kwana kane kobonguni ngesi, ketuboros konyet ikar akaisaongon, korai ikar akaisakany kauni lukapolou, kede ebela bon kakanike. Kanukinyo? Ibore ngin yen anoki kotauke kebu keraun ibore ilopet. Enyonyoikinitai do ngesi, ido ajeni ngesi ebe ajaatar ngesi kede EBALA KWANATA EJAKAIT. Amamei ibore



apedori kwana airebokin ngesi. Mam ngesi epuda adiojore. Ajaasi Edeke ka Ngesi. Kerai ngun bon nges kipuda ngesi: Edeke ajaut kanges.

Oo, naijenia jo ebe kiyakiarit Edeke jo aswam ibore mutan, ido koseseni ngin ikunyakini nen, kanen cut emamei ibore ice epedori ayangaar aiboisike. Kes ngun bon.

36 Eitunit eong apakio nu elimokinitor eong Ejakait nuka iboro ice lualosete atakanun, ido konyet eong adokar ka aanyun da ngin eperi kanepakanen, biai...Oo, aipup bo lolo nabiai! Edaunitai sek ejautene ngol aigaligal, kes ngun bon, teijo, naarai Edeke nges abala nen.

Eitunit eong, luipu kayesi iitunito, nuka itelepat yii itajarunio ko Finland, kosodi konyet kama kokatwak, kebu amotoka koar. Abu eong kabwo kanen kosiep loka erot, kasodi ageun alosit awai kaneajai ikoku ngin, ido abu kebelokin kasodi angoliar kau. Ido abu icebore kidokok akekan okeperika, ido abu eong kaomite ebe kerai Onac More, kwabo amamei itunganan yen aapie kamakang. Ido abu eong kangolia kau, kasodi konyet eong angoliar kuju omoru kaanyu. Katema eong atiar, "Eebo, aanyunitor eong eukot lo kanenice, konye mam oni kitorunit orot lo. Kipou ketorutu orot ece. Aibo ejai erongat ngol?"

Ido abu eong kangolek kasodi aanyun amotoka ngin kokwap kanen, enukanuka; kaanyu itelepat ngin kanen kede eke...eperi kanen kede etube loka itima loiceeritai, kwape kinyaritor oni kane. Ebeloro akonye, kwa ajaatar nuka Onac Way apaaran ya naebirokinor ngesi kwap. Ido ajai ikeju ngin ipeluno kasokosit, nabilibilitore atutubeta nuka akejeke. Ido koleleete aokot kakonyeke, ka okume, ka akii da. Kasodi asesen ipaleke yenididi, ipale yeniurien; ido kodonyitete kede apesan, eke, *kane* ido kosiep ediopet loka angabeteke; ido kikiara asokosinike kuju, bala asokosin nuaojak kwa kinapenena ikar luipu kokau.

37 Ido abu eong kangolengol, ido arai nen becebec, becebec koipone loalimokinitor Emoyo Lokalaunan eong ikar iarei kokau, naipotu yesi kere kiwadikata ngin toma Obaibulin kus anatar akwap na kere, ebe apote ngun atakanun. Oo, kanen, do konyet ejai ejautene toma akan. Komam apod arai etwanit ngesi biai, komam apod nuelimuni itunganan idio kere, adaunos ngun. Ibusakinit ngesi abongun!

Katema eong atiar, "Arai mam ikoku yen ejaruni katwanare kana, apolouke do arai eong enabi lokaingal, arai do eong abwoikiniton loka Edeke lomam ibecokino. Naarai, kobukosi, ikaru iarei luatuboros, abu Ngesi kolimok eong ebe apote nu atakanun. Ido kangina ikejaanakinak lu, ido kere, iwadikatai ngin apapula naka abuku naka Ebaibuli kosi, ido ngin bo na kane becebec. Kosiom ngin kotoma apapula naka abuku, epone loabeitor 'ajaut kotoma akwap ace, amor nuiteerikina, ka ace da kwangin, eponio aiar, ka ajaun...ejaun akan-nakoteten naka erot'" Katema eong atiar, "Ngesi bo ngin kanen. Emame ibore epedori airebokin ngun. Edaunitai sek aigaligal ejautene lo."

Aiyuun ngin naajai toma otauka arai naenyonyoikinitai. Oo, arai bon eong kapedo ti aitetemun ngun! Aiyuun ngin naabu Edeke...naeyuunitor eong Edeke, ebe abu Ngesi kolimok eong, ido mam abu komen, abu kolimok eong, "Erai ejautene loejai kwap naka aigaligalio kwana do. Ejaasi ne cuticut ngun nuabu Eong ketodik jo ikar iarei luatuboros, ido een eperi kane cut becebec kotoma ainapetai. Ibore bon yen iburaj jo aswam nges alimun akirot." Ido abu itelepat ngin kojaru kokatwak. Ianyutu?

38 Ajai eong aoomoi, ido kaseseni kau mam ajai Onac Fred Sothmann loeboie kanen, ka Onac Banks Wood ka ngul. Apaaran ya, kokuju ko Alaskan Highway, epone loabwoia eong kane kokanisa kasodi alimokin yes nuka etiang ece lo asubitos amumwar bala nuka eloba, inches akaisaongon-kiarei, kosodi edubu ngol loekwang epura. Mam ber eong ajaunar ngina lem sek, ido epone lo...ebe abuni eong adumun lo, ido epone loabunio ajaun, ido imwasi ai apote ajaut ka eong, ido epone loaponita kesi anapitor igoen. Ijenete yesi ngun, nginidiopet kayesi, isabitin ka isabitin eringa ngun ketakanuna.

Ido kanen naalosio eong ngina, komam ajeni ngin, ajai nen etiang ngol eperi. Kasodi eong alosit, ido-ido nges...arai namam epedor. Arai ti ekamejan kojoni, arai kopupi ateepu na, epone lomam jo ipedoria alosit aitereikin akonye nuka etiang, ti ngol kesomun kosodi akerit. Konye mam lo abu.

39 Ido kangina ikaja ngol kagolaka naetiakunitai Kanen ikaja loekwang epura ngol, cuticut epone. Ido ejai eipimas eperi kanen, epimaet, kanu aitodiaria aibecokino ke. Ido amumwarat ebuni abongor aurianar kede inches iarei arai adepar, naeringar ejari kotiang kosodi ngin aonore, konye mam na abu kobongo aurianar. Eroko erai becebec kokume inches akaisaongon-kiarei. Iany? Eperi kanen loekwang epura, erai ipuutin-ikanyikaarei aojau, cut becebec, ido nginibore kere kerai becebec kopone loajaar ngin, eperi kangina kwana.

Konye natemaria etunganan lo eong atiar, "Kwana kongolek, kongolek, Onac Branham, kidumu oni etiang lo loinerit jo nuke, konye kereka ibu jo kolimokinite eong ebe ibuni aige adumun edubu loti loekwang epura eringa jo kedolo kwap naka erongat, kau laiye neejasi itelepai ngul, ngol loenapit esaati loliba."

Katema eong atiar, "Erai ngin EBALA KWANATA EJAKAIT. Edeke nges abala nen."

“Konye Onac Branham,” abala ngesi, “Apedorit kereka eong airikun asesen nginibore kere kane, amairon nuipu, emamei ibore. Aibo do ebunio ngol?”

40 Katema eong atiar, “Mam ngin ikamunit eong nuka aitepeg. Edeke nges abala nen! Ido erai ngesi Yawe-Yire. Epedori ngesi ayaun edubu nen. Epedori ngesi aibwaikin ediope ngina.” Ido abu Ngesi kismawau. Ido ngesi bo ngol ejai ngina. Erai ejautene ejai kwap naka aigaligalio.

Ido naabu Musa koanyunia ebe etopolounitai ngesi kanuka alosikinet kana, ido kedaunit ngesi airiamuna akonye ka akonye, ka Edeke lo loepol Loabu kitolomu anyarit ngin, ido kebu kinyonyoik ngesi ka aitijenar da ngesi, kosodi atemar, “Anyaraunio kon nges na, Musa. Ajai Eong aiyakiar jo, ido alosi Eong aitodikin jo aibusesuKa. Ido Eong lo kane, kotoma okiot, anoki. Kijesar kwap ngina! Abuni Eong ajaut kajo.” Mam da ber ngesi epuda ebela. Ajaatar ngesi kAKirot, AKirot naitodiaritai kwape nakabeit, ido kangina kolosi ngesi. Abu ngin kinyonyoik aiyuun naajai tomake.

Ido inyonyoikini ngin oni aanyun ebe kijari oni kotoma apaarasia nukawasia, adumun ebe aanyuneta nu kere nukiseseni oni iswamasi, nuineritai kotoma kaNaiwadikatai, ebe apote atakanun kotoma apaarasia nukawasia; erot kere ameun Kokuju, toni apedorosio nuka politiks, kosodi einono loka itunga, amunaario naka iponesio luka akwapin, ido kotoma angor, ido epone loeponiata kesi aswam kotoma apaarasia nukawasia, kosodi epone loeponiata ikiliok aswam, ido epone loeponiata ikanisan aswam, epone loeponiata atekerin aswam, ido epone loebunio Edeke aswam. Ido kiseseni oni ngun kere eperete kanepekane kamawok.

Oo, inyonyoikini ngin aiyuuniwok. Itolomari ngin oni kinga toma airimokineta nuapolok. Iany? Ngin etiakuni oni kama ejaas iboro ice lukakwap. Ianyu? Komam apod arai kidisiak oni biai arai ikidioko oni biai, arai kikienare oni ne biai, kiboliare, mam ngun eyangaunete aijulakinet adio kere. Kes ngun bon. Kiseseni oni ngun. Ejai ibore yenejai tomawok. Kirai oni luinerunitai sek aanyun esawa lo, ido emame idiobore yenelosi airebokin oni aanyun ngun. Amen! Kane inherit Edeke ngun. Erai ngin nadau aismawau. Kiseseni oni ngun. Oo, epone lokimala oni Edeke kanuka nu! Oo, konyet do, itolomuni kinga aiyuun kon nakianyunia oni iboro lu etakanunete kane.

41 Kwana, kane bobo kisiomuni oni ngun, “Abu Musa Koomite amorosit naka Kristo araut abar itia iboro luka lukakais nuipu luko Misiri.” Kwana, abu kitopolo amorosit naka Kristo.

Kwana kiitutu, “amorosit naka Kristo.” Teijo, ejai amorosit kotoma aijaanakin Kristo. Arai irai jo yenijenaara noi kakwapin, apolouke mam do ijo ipedori aijaanakin, mam jo ijai aijaanakin Kristo. Mam, mam jo ipedori. Naarai, koany jo, ejai amorosit na eupasi ka Ngin. Erai duc akwap naemoromoi.

Kokau noi kangina, ilukumin luka ikar luatuboros, ajai amorosit aupasi kede Ngin. Kosodi Musa kebeit araun parao, kerai ngesi parao loabuni atupakin, okoku loka Parao. Ido kebeit ngesi araut parao loetupakini, kodumunite asianut kotunga, konye ca abu ngesi “koyait...” Aomite apolouke “ayait.” “Abu ngesi koyait amorosit naka Kristo kwape iboro luepolok itia ngul kere luapedori Misiri ainakin ngesi.” Ajai Misiri toma akaninike. Konye, ca, ajeni ngesi ayangaar erot loka Kristo kerai amorosit, konye eyalama ngesi noi ajenun ebe ajai ibore yenajai tomake, yenabu koinak ngesi ayait amorosit na naka Kristo, amorosit naka Kristo, nges ti, araut naepol adepar amwekimwek kere naerumunit ngesi. Kejaatar ngesi ka airumet kotomake nakepol noi itia ngin nakebu airumet nakokinga koinak nges.

42 Oo, karai oni kapedosi araut lu kepone kangol lolo, ido kacamakisi Emoyo Lokalaunan ainyonyoikin ngun nukiijaar oni kotoma wok, aiyuun ngin, toma aijar naka ayongit Edeke, aijaikina neejai Kristo!

Kwana, nepepe kaiyuun kwa kana nakejaatar ngesi, abu ngesi koany, ido abu koomite amorosit ngin araut ayongio.

Lolo, arai kepedo itunganan ice atemar, “Hei, irai jo idiopet kotunga kangul, ngul?”

“Uh, uh, eebo, uh.” Kirumitos ijo ileic mot kanuka ngun.

Konye abu ngesi koyait ngun araut abar naepol adepar akwap kere, naarai ebe kejai ibore ice tomake yen apedori ngesi ener alimun kosodi atiar, “Eebo, ayait eong *nu* kwape nuepolok. Eraasi *nu* nukangosibib naepol noi. Eyalama eong araut idiopet kakesi.” Iany? “Eyalama eong aimarakin elopet kwape Eburaniat kwabo mere Emisiri.”

43 Ikristayon lolo ibusakinit ener ibore ngipengin. “Eyalama eong ayait eong elopet kwape Ekristayot, atiaku kama koboro lukakwapin ka ainapeta nukakwapin. Mere bon kwape emeeba loka ekanisa, konye kwape Ekristayot loeuritai-bobo ngol loejari kwape ebalar Naiwadikatai. Karaida kenyaritai eong, karaida komeeban luka okanisa, 'loilamara,' konyeca aomit eong ngun nuepolok - araut ibore yenepol itia korai arai eong etunganan loejenaara noi koibuga arai kotoma akwap. Ejok gwai eong araut ngol itia araut President loka United States, arai ekabaka loeyait akwap. Ianyu jo? Aomit eong ngun kaikiara noi, naarai Edeke kotoma aitimiKe, eringa kepesikina apetetait naka akwap, abu koany eong, kosodi aibwaikin ikinyomit yenididi toma nen, ebe abuni aiyuunika aipor kokuju naka iboro lukakwapin. Kosodi kwana

anyarau Ngesi eong, ido ayait eong aiboisika.”

44 Kwape abalar Paul, abu ngesi koyaite eyapesike kede naikiara...koany, ido, oo, ebe kebu Edeke kenyarau ngesi kama karaut ekesisianakinan loepol bala Gamaliel. Konye aponi konyaraunai Paul araut asubanit kanuka Kristo. Iany? Kwana ibore ngipengin.

Koany, kede aiyuun kwa kangin, mam ngesi abu komunokina aseseneke, ngun nuapedori ngesi asesen. Kwana, emamei ibore abu ngesi kosesen kokinga kangina kilema abunget naka itunga luiswamaete kelupe, ibulesin, kotoma aidaris, koarete kanginipaaran, kiposete kede ikibokon, kokienare, aiyuunetakec nukediini, araasi “Luilamara.” Ido ajai parao loeboie koicolong kangol, lomam ajeni ido komam epodokinit idiobore yenikamunit ediinikec. Mam ngol ajeni idiobore yenekamunit ngun. Arai ngol ekapiirit, aso abu bon ngesi...Aputo bo naikoni ai na lolo! Ido ngesi bo ngin kanen, ediini loegelara. Ido epone ebe karai Musa lo, eringa ejai aiboisit alopet kede president, arai etunganan lokapolon, Parao, ayangaar aiboisike ketwana ngol, ido arai ngol etunganan loamojongit. Kwabo do abu Musa koomoom ebe anyaraunio ngin...Abu ngesi kongolia kinga ngina, ido arai odirisa ngopengol angolianaria Parao kinga, naarai ajai ngesi oreke.

Ido abu Parao kongolia kinga kosodi aanyun itunga luekiaritos akaninikec kuju, ido alemunio ekiboko kosodete aipot kes kiton atwanare naarai ajaasi kesi ailip. Erusonokinete kes kede ekileng naarai abu kes kokurwo, amamus arimaar kadiopak kere, ido aitwasam kesi kiton awatekec nuamojongito anyamun, ido ainakin kes ainyam inyamat atutubet kaluilesikino. “Eebo, mam kesi araasi idiobore kilema abunget naka luilamara, mam ber eyapiarit araut itunga da.”

45 Kwabo do Musa, kaiyuun ngin kotomake, abu kosesen ngul, ido abu ngesi kotema atiar, “Eraasi ngul itunga luka Edeke luisirerengitai.” Amen. Alelakinit eong ngun. Kede aiyuun kwa kangin, mam akekonye apotu kibirokinos toma amwekimwek nako Misiri. Apotu ngun kodooto toma aisumunet naka Edeke. AkonguKe naka emorukaalet naka aiyuun abu koany adepar amwekimwek nako Misiri. Ngesi, kiitunitos, elosi kwana ngesi araun emorukaalet kwana. Erai ngesi enabi, ido akonguke naka emorukaalet ikiara kuju naiboro kangul. Oo, epone lo alelakinit eong ngin! Huh! Ikatuan!

epone loetapitor lolo, lolo, Ikristayon agongakina toma apupeta kec, ido nuka nuepedoritos kesi asesen, arai ngun nuepedoritosi kesi aijen, aibois naka aiyuunikec, agongakina mam ejaasi nuipedorit jo asesen kede akonikongu ka amwekimwek. Bala yes angor, ajai duc eong eworoi yes, nuikamunitos ijo aibusakinit acamakin ikonitit kopoloros, mam ibusakinit jo anapit make-up, ibusakinit yes aswam bala amucaalan ka Akristayon. Ingoliari jo orot kosodi aanyun angor lolo enapitos kopone loerono, eebo, iwomit jo, “Eebo, erai ngin nakokanisa, kanukinyo mam eong apedoria aswam kwangin?” Ianyu? “Ido etubonori ngin iketim, kanukinyo-kanukinyo mam eong apedoria aswam ngun? Eebo, esubit akesa ngin kwape naejijim ido kwape naecobe noi, ido ejaatar kepitene lo amameotor ber eong da. Eebo kanukinyo mam eong apedoria aswam ngun.” Naiswamaunia jo ngun ijaikini jo aiyuunikon ikamuni esumedede. Ianyu? Mam ijo ijaikini aiyuunikon arereng na apolo. Kogeu kanen, kwape abalar eong.

46 Abala icetunganan ebe, “Onac Branham, akwap, itunga, eyaitosi jo kwape enabi. Mam ibusakinit jo airetanakin angor koipone kangol, ka ikiliok da, kanuka iboro kalu. Ijo, ibusakinit ti ijo aisisianakin kes eipone loebeitor aidwar ka adumun da ainakineta.”

Katema eong atiar, “Biai apedoria eong aisisianakin kes algebra komam da ber kesi ejenete anyukutan kec nuka ABC?” Ianyu?

Kwana kogeu do kanen. Kitalaun jo ilopet cut tetere neilomara kinga toma orot kotakani jo kwape Ikristayot, taitai, iteijo, kosodi konyet agear aswam bala idiopet. Iteijo? Ido mam jo ipedori aswam ngun kotomakon. Ekoto korai Kristo nges ebuni tomakon. Ido arai eperi ikinyomit ngin kotoma kangina, kosodi Aica ngin atiror nges, ebeit abunore toma Aijar. Arai mam ebuni toma Aijar, kemamei ibore kangina yen tikebu toma Aijar. Naarai, abu cut ngin kitogogong ngun kama kaluce, iteijo, ebuni ngin toma Aijar katipet nape etirori Aica nges.

47 Erai ngin aitoronet mama ejaas angor, ajeni eong, ngun nuepupete ateepu na, araiboot nuepote aipup nges. Erai airetakin net neijai jo, inac. Ibusakinit korai. Ibusakinit korai, naarai itodiarit. Mam eong apodo nuiswamat jo; epedori acepak kirai jo yenikedidiini, aijarakon kere, epedori acepak iboit jo kotoma okanisa, papakon acepak erai ekejaanakinan, araiboot okilenikon erai ekejaanakinan; konye alemar bon namam jo irimaritor-Akirot naka Edeke, itodiari ebe emamei Aijar kanen. Naiwanyunia jo ibore eyaunio kinga, ka Aijar naka Emoyo Lokalaunan, kosesen Ngin naetiroria Ngin luce, kosesen nuiswamaete kesi, arai eyauni Ngin ngun mamakec, mam erai nukaumokin...Kanukinyo...?

Airetakin net nanyoin mama ajaasi Iparisayon ngul, luapotu konyarata Yesu, naabu Ngesi kopedoria amisiikin aomisiokec, abu konyara kes, “Belesebul.”

Ido amalayat natai ngin abala, “Kanukinyo, erai Ekesa lo Mesia. Inera Naiwadikatai ebe ebuni Ngesi aswam nu.” Teijo, ikinyomit ngin yen enerunitai sek keperi kanen. Ido naabu Aica ngin kimiliaikinia nges,

abu ngin kobu toma Aijar. Mam ijo ipedori airebokin. Mam ijo ipedori aibwa Aijar.

Ipedori jo ayangaar kosodi abukokin ekokot toma aanya, kosodi aaraar ngun kotoma apak naka aiterot naka akako. Konye kalibunet naka aanya naetupakini, aibo ejaas akoninya nuipu? Ejaas cut airimor ekokot ngol. Naarai ikinyomit ngin yenejaas kaijar kokwap naka amoru kangin, na egeunia akolong aica, mam ijo ipedori aitikokin. Ebuni ikesa yii aridun aitorun nepenen ariri naka ngin kosodi aikeun akekou kuju mama ejai aibuses naka Edeke. Teijo, mam ijo ipedori aibwa aijar. Naecaikina akolong aijar naka iraan, ejai nges aijar.

48 Ido naetiroria Emoyo Lokalaunan Aijar Naiwadikatai ngin naejai toma otunganan, itolomuni ngin araitoke *kanepakanen*. [Kodoyari Onac Branham ibokoroke.] Ianyu?

Aso komam apod nuka eipone loiraar ijo yenikabeit ka amunonut da, epone loibalar jo ebe mam jo irai, ka einer, atemar ebe keraasi kesi...Angor nu nuenapito igoen lu lukarokok ka iboro kokinga kangina, cut alacit igoen napeduc, kanuka erot. Karaida mam yes icamunitos ebe iswamaete yesi, mam ijo ipedori acamun. Ipedori jo aitogogong ebe mam ijo alopet igwaunit nuka adoteu, konye, kotoma Oitabo loka Edeke, ijai ijo aswam adoteu. Abala Yesu ebe, "Ngolitunganan loeseseni aberu kaingobel, adau aisiol ngin kotauke sek." Kwabo ibu ijo kitodiar alopet kopone kangol. Teijo, mam ijo ipedori aanyun ngun dimikito keperi aijar ngin kanen.

Ingolekini jo itunganan ice, ingolekini ijo kosodi atemar atiar, "Eebo, ajeni eong Inac Jones. Onac Jones e...era! ngol ekejaanakinan. Iswamai akeberu *nu* ido iswamai *kwa*."

Mam eong apodo anyoika iswamai ngin; era! Na Akirot. Abala Yesu, "Koraun akirot naka nginitunganan aingal, kwabo Nakang korai nakabeit." Era! Ebaibuli. Ido na teniteni etiroria Aica ngin nges, iburai ngin abunore toma Aijar. Ejai ngin abunore toma Aijar.

49 Kwana, akongu napolon naka Musa, akekongu naka emorukalet, abu kosesen adepar amwekimwek nako Misiri.

Ekeyuunan Lokristayot loteni teni lolo, komam apod arai anyoika ebala ekanisa, nuebala itunganan ice kere, naetiroria Aica ngin, kosodete kesi aanyun aitodiaret obe naka Edeke, Epir ngol loka Akim ikaja kanen, ka aanyuneta ka aumokineta nuesumunitai, Naiwadikatai iperikinio toma, ebuni toma Aijar. Mam akiro arai edit ngin biai, ido arai imwasi ai ikidioko, ekodet duc loka Edeke eraasi luikidioko. Ianyu? "Sirikikurianar, ijo yenididi- isipan yenididi, era! akote naka papakus ainakin yes Akabakanut." Ianyu? Ikamunete kesi ngin. Ikamunitos Edeke nu aijukun kesi toma kama ka ngolirionget, ngininapetai, kanginibois, aanyun Ngin, arai itebeikinitai kesi toma Aijar.

50 Kongolek jo emojong Simeon, etebeikinitai toma Aijar. Neabunio Mesia toma oyekalu, kotoma apoto naka imukeru kotoma akanin nuka totoke, Simeon, kokau kotoma agola kanenice, esiomi, abu Emoyo Lokalaunan kitonyou nges, naarai ajai ngesi idaret. Ajai Aijar ngin tomake. Kotema ngesi atiar, Mam eong atwani aitodol naanyunia eong Kristo loka Ejakait." Ido engol kanen Kristo loka Ejakit ejai toma oyekalu. Abu Emoyo Lokalaunan kingarenik ngesi anyoun kopeluke, kinga, kosodi alosit aitor nen kosodi aijaun ikoku ngin kosodi aidak, ido kobala, "Kotwar do kwana eKonibulesit inapakina, naarai aanyutu akakonye aKonitajar."

Ajai aberu namojongit okoona, nanyaritai Ana, na ejaanakini Ejakait apaaran ka akure. Ajai ngesi da eduarit sek, ido kobala, "Ebunit Mesia. Aseseni eong Ngesi ebunit." Konye kereka amudukana ngesi. Ido kapak kangipekangin, najaar Ngol nen...Aijar ngin na adite najai tomake, najai eduarit sek, "Abuni ngin ajaun nen! Abuni ngin ajaun nen! Abuni ngin ajaun nen!" Konyet do Aijar ngipengin, abu Aica kobu toma togo, kotoma apoto naka Imukeru, kwape "ikoku yeneuritai kokale," iweniwenitai kausiok nukimukeru, elomuni aitorun togo. Ido abu Emoyo Lokalaunan kotiro aberu ngin namojong na amudukana, kosodi ngin abunore kotoma Omoyo, ingarenikinitai aitorun otunga, kosodi aibwo kama ajai Imukeru yen, kosodi aisirereng toto ngin, ka aisirereng da Imukeru ngin, ka alimor da nuapote araun nukoingaren nuka Ngin. Teijo, itebeikinitai alomar toma Aijar! Ianyutu?

Kongolek ber jo kes, mam adolitos karaida itomon kaarei kakesi. Ajaasi itauon ikanyikauni bon luaponi kitajarai kapaaran naka Noa, mam epu noi, konye ngul kere lu etebeikinitai alomar toma Aijar apoto kopotu kapak kangin. Koany epone loiswama Emoyo Lokalaunan kotoma kanginitur, iriuni itunga.

51 Kwana kidumuni oni ebe aiyuun naka Musa abu kingarenik ngesi aikweny aidar nuapote ajaun, mere nukejaasi. Asesen moi aibois naka lolo. Asesen aisumunet aibois naka amwekimwek. Asesen itunga aibois naka erionget. Ianyutu? Abu Edeke kiswama ngun.

Abu Lot kopedo aseseni amwekimwek naka akerianut kokwap ko Misiri, arai kokwap kotoma Sodom. Abu Lot kosesen nuepedoros nuka adumun isirigin luipu. Abu Lot kopedo aanyun nuti-...nuepedoros ngun na eteluoria ngesi laiije Sodom ido ti acepak ngesi keraun...Kanu keraar ngesi Eburaniat, elemuni ngesi korau etunganan loepol kangina, naarai arai ngesi etunganan loepol acobeu noi, ido ocenike Aburaam, aso abu ngesi koseu abear Sodom. Acobeu naka Lot abu kingarenik ngesi aseseni arereng naka

amwekimwek. Konye abu aiyuunike kisumededek kanuka ngun, mam nges abu koany akim nabuni amudiar epone kaijar kangin.

Ido epone ngol nges ejaatar itunga lolo. Esesenete kesi nuepedoros kanuka araut yenika erionget loepol, esesenete kesi nuepedoros kanuka araut itunganan yen ijenaara kotunga luko oibuga, konye mam kes esesenete nueped-...Mam kesi iteete ebe aiyuunikec esumededeki. Akoto eong ainyogoikin ngun kinyeinai amisiikin erono. Angor lolo, kesi, kwape abalar eong, ekotosi kesi aswam bala angor ngun nukosineeman. Ikiliok lolo ekotosi aswam bala luisiyalaete itunga ko television.

52 Ikalimonokinak lolo esubit bala ekotosi aitarauan ikanisan kec koputosi kede igurupun lukatinen kwana lukepone ece, ajaut eimeebane ka ace da kwangin. Esesenete kesi nuepedoros nuka araun ebishop arai, ekaanyanaran loimorimorit, arai icebore kwangin, arai keupakinos kesi kede ekanisa; kojalakinet Nuiwadikatai, kwabo kojai Ngin eperi cut kanen koingareikec, kede Apedor naka Edeke naitodiaritai ejok noi kwape nakabeit, ido kanuka Akirot nakajaran naka Edeke ejari kotoma otunga. Konyeca, mam kesi ekotosi Ngin. Etemarete kesi atiar, "Mam isio kikoto ainyalakin kede ibore yen ikoni kwa Kangin." Elemari Ngin akaadi kec naka eidicane. Elemari Ngin ainapetakec nuka ediini. Konye kereka itunga luainakina, kwape nat Lot, iboiete ko Sodom kojenete ebe eroko ngun. Iany? Iany? Nunyoika iswamaete kesi naiswamauniata kesi ngun? Ijaiknete ikamuni esumededek aiyuun adio ngin nakejaatar kesi. Mam epedori aswam.

53 Kwana, Musa abu kijaik ngin apak, ido abu ngesi kiboikin...abu akeiyuun kisikam akwap esumededek.

Arai aiyuunikon nges ebuni aisikamun amwekimwek esumededek arai mam amwekimwek nges ebuni aisikamun aiyuunikon esumededek. Kwana, Erai ijo ayangar adiopet na araimam nace ya. Ido iseseni kereka jo mam Ebaibuli ijulanakin. Erai Ngesi Edeke lomam ijulanakin.

Aso kereka kwana kidumuni oni, lolo, ebe itunga lukapaaran kana, teijo, esesenete kesi mama ejaasi iboro luepolok, iriongeta lukapolok. "Arai eong loka Mutan-ka-mutan." Iany? Ido elosete kesi kwap ngina, ido, kongolek, emamei atiaiketait kama ejaasi itunga lukorotin. Emamete iboro ice. Ejaatar kesi kede ibore ice yenikacobeu, ido kiyatakinete alosit. Nainerar jo nuka Edeke aitangale, Epir loka Akim, Aica naka Edeke, etemarete kesi atiar, "Nukadam ngun."

54 Abu etunganan kolek apoto naka Emalaika loka Ejakait, kapaaran kaya, ekejaanakinan loka Baptist, kosodi akienar Ngin. Koany, erai ngin ainyanakin. Teijo? Emamei aisionio kanuka ngun.

Ngun kes nuabala Yesu, teijo. Erai ngin ainyanakin; Naianyunia jo Ngin iswamai aswamasio obe nu eswamenene Kristo. Ido abala Ngesi...Na, aanyuniata kesi aswamasio ngun kotoma Kristo, arai kereka Ngesi Asubanit, ido apotu kesi konyarata Ngol "Belesebul, ajokit," naarai eswamai Ngol ngun. Kosodi kwana do ebalasi kesi...Abu Ngol kotema atiar, "Esionie Eong yes kanuka ngun. Konye kebu Emoyo Lokalaunan aswam ibore ngipengin, kiner jo akirot asurokin Nges, mam kisionio jo ngin, kotoma akwap kana araida kakwap naebunit." Iany? Akirot adiopet bon nges iburai jo alimun asurokin Ngol. Iany? Kosodi konyet...

Naarai, arai Aijar ngin, arai itebeikinitai ijo alomar toma Aijar naka Ikar Kere, ti bodo Aijar ngin kebwangun alomun naianyunia jo Ngun. Ti ijo ijenunit Ngin, bala aberu ya na atan, ka ngul luegelegela. Konye arai emamei ngin kanen, mam epedori alomun toma Aijar, naarai emamei ibore kanen yenibunio toma Aijar kede. Kwape atapitor amojong totoka einer, "Mam jo ipedori adumun aokot kama ejai aliasit narengan," naarai emamete aokot kotomake. Aso, ibore ngin ngipengin.

55 Ido ijaikini esumededek mama ejai aiyuun adio naijaatar jo. Apedori Lot asesen amwekimwek, konye mam nges ajaatar kaiyuun na elesikino kanu aanyun akim nabuni amudiar amwekimwek kwa kangin.

Aumokinit eong arai kijaar oni, lolo. Aumokinit eong arai oni, eebo, kwape angor ngun nuekotosi araut nuejenaara, nuekotosi aswam bala nucengor kotoma okanisa, arai keanyutu kesi ebe ekotosi aswam bala nuce. Esesenete kesi nuepedoros kanu araut aberu naitemelel, kanuka araut naejukit ereet. Epedorete kesi asesen aberu naitemelel noi kanuka ajaut kede atakan naka atumun, kanuka aitub itim ka aswam da bala nuce kwa, arai nukosineeman. Konye aumokinit eong arai mam tope ngun ejaiki aiyuunikec ikamuni esumededek, kanu aijen ebe ebalala Ebaibuli ebe, "aberu na iswamai ngun erai nae-...aberu naitisilikina," ido, "aberu na enapit anapito naka ekiliokit, erai naketal kakonyen nuka Edeke," iroodin, ka ice da kwangin, ipalei luuriesik ngul lu enapitosi kesi. Erauni do ngin na eini noi kiton araun ibore yen kanginiparaan koiswamae loka itunga ngul luiswamaete ngun. Aumokinit eong arai tope mam ngun ijaikinete esumededek ikamuni aiyuun adio ngin nasek ijaatar jo, karaida ber alosit okanisa, iteiijo. Ibore ngin nges iswamai ngesi.

56 Abu Lot kiswama ngun, ido abu kijaik nges esumededek, ido abu koinak iketunga esumededek kokwap kangina. Mam kes apedorete aanyun ngun.

Konye Aburaam, kede aiyuun naetogogongitai kwape nakabeit, mamaike, mam abu kosesen amwekimwek, mam nges akoto idiobore yenikamunit ngin, karaida kejari ngesi aijar nakurac ido korai nges

elopet bon. Ido ajari Sara kokinga kamoding kane ationior alosit, akwap naekuracac. Konye mam kesi apotu kosesenata amwekimwek arai nu tikepedoros nuka araun luejenaara.

Sara, aberu naetemelel kakere kotoma akwap ngin, abala Ebaibuli nen. Arai ngesi naetemelel, etemelel adepar angor kere. Abu ngesi kosalak da ka arimarit okilenike, kiton da ngesi anyarit ngol "ejakait," ijulirat Ebaibuli mamake, cut kiton laiije toma Aitutuket Nakitetet; ebalu, "Iraasi yesi adweke, alemar bon nairimaritotor yesi aiyuun." Teijo, abu konyara okilenike "ejakait" keng.

57 Ido abu Emalaika loka Ejakait kipejok eyekalu kec kosodi...arai ewema kec kokinga kangina, kosodi alimokin kes. Amamei da ber kes etogo loeboioto; aiboi kokinga kotoma alupok nuikuraacasi. Ido aso konyet jo. Iany jo apaaran ituputooritari bobo, bala cuticut kwape ajaar kapak kangin?

Kwana Musa nepepe kaiyuunike naepol, bobo, tikepedo atiar, "mam" mama ejaasi iboro lukativen kwana lukakwapin nuka tinenikwana, kosodi aiswamaun aseunet naedolit. Abu ngesi koseu aiticanio nepepe kitunga luka Edeke. Abu ngesi koseu aupakin ka ngin. Kanukinyo? Aiyuunike! Abu koany aisumunet. Abu koany apak nakawasia. Abu ngesi koany kalaiije kotoma moi, kosodi alacakin aiyuunike. Ido mam ngesi abu kopodok asesen ngun nuapotu akekonye koanyut kotoma nu tikepedoros kane, ebe arai ngesi parao ido alosi araun parao. Abu ngesi kosesen cut aikalam ngun kotoma moi.

Oo, arai bon tikopedosi itunga aswam ngun, mam ti esesenete akwap nakativen kwana. Arai kisesen jo akwap nakativen kwana, iswamauni do jo aseunet kede ngin. Kibwa akonikonye kama ejai ngin, do kosesen aisumunet naka Edeke, kalaiije kotoma moi.

58 Kanuka aiyuunike apedori ngesi aseun. Abu ngesi koseu anyarao okoku loka Aburaam, ido abu kogir anyarao okoku loka Parao. Kikwaikini ai ngesi epedori, korai ajakanut kere...Misiri epugat akwap kere. Arai ngesi ekabaka loka akwap, ido arai ekatumunan loka ikar akaisaongon lukapolou, kane ekapakina aiboikin oicolong. Konye mam nges abu kite acobeu.

Kongolek ber angor nu ti eperete kanejai ngesi, apaaran ka apaaran, nupu noi kakesi. Kongolek amwekimwek; aiboi ido komasi ebino, ka asesen da angor nuimujalalasi kakonyeneke, kwape kekosioto, ido kipukupukete ngesi ekwam kede...Ido angor nueponitosi kakwap kere, kosodi ilulun ka abar, akejore kokinga kangina. Ibore bon yenikiburai nges aswam nges aiboi ka ainyam inyamatake luajokak noi, kosodi atemar atiar, "Kijukasi e...kijukasi ebaraks loka ajore enaba *mutan-ka-mutan* kwap mam ejai *mutan-ka-mutan*, kikamasi akwap ngin. Acamunit eong akoto cut eong ngin." Arai bon ngun kes kiburai nges aswam. Aiboi kanen ka kesi aipukupuk nges, ido nges angaarit akekituk; acamakin a-a numinan, angor nuelacitosi igoen nuka apaaran kangin, abukonokin ebino akitukuke, aitananakin nges ikenyamat kotunitosi ngesi, angor nuitemelelasi kakere nuka akwap. Amwekimwek kere nakejai, ajai eperi kanen cut eiduny kanges.

Konye inyo kereka abu ngesi kiswama? Abu kongolia awai kama ejaasi ngun. Ajeni ngesi ebe ajai akim nen ekapakinitai kanuka ngun. Ajeni ngesi ebe ajai atwanare eperi kokokoro kangol. Ajeni ngesi ebe ajai ngin. Kosodi ngesi angoliar laiije otunga ngul luamwangitai ido kogiritete, ido kanuka aiyuun abu ngesi koseu angirikin amorosit naka Kristo, ido abu konyaraikin elopet bon, "arai eong okoku loka Aburaam. Mam eong arai okoku loka parao kalo. Karaida itaraunit jo eong ebishop, arai edikon, arai archbishop, arai ipaapa, mam eong arai okoku loka ibore kayen. Arai eong okoku loka Aburaam, ido akoto atiakun kama koboro lukakwap." Amen, amen, ido amen! Kanuka aiyuun, abu kiswama ngun!

59 Abu ngesi kolema amwekimwek awai. Abu ngesi kolema nu tikepedorotor nuka araun ebishop loetupakini, abu ngesi kolema nu tikepedorotor nuka araun archbishop loetupakini, arai general overseer kaseu naebunit, arai nupekere kerai, abu ngesi kolema ngun awai. Abu ngesi kogir aite ngun.

"Kwana, arai karaun eong ebishop, ti alomari toma kobalasi itunga, 'Papa Loagaion,' arai 'Dokita *Mutan-ka-mutan*,' arai 'Ekimat *Mutan-ka-mutan*.' Epone loeponiata kesi, ikejaanakinak kere katukot, ibapabapete eong epur, ido kobalasi, 'Ijoba, esapat, ejaatar ebok ngol kede ibore. Ajai eong alimokin jo. Oo, sh-sh-sh, kopala ber jo, abu kereka bishop, teijo. Nuelimuni ngesi, eraas ekisil. Teijo, abu kereka *Mutan-ka-mutan*.'" Epote itunga aporonor kakwap kere kanu araut e...aanyun ipaapa, ido ainu akeju ka igilun, ka ace da kwangin. Erai arereng mama ejai Etulikit, erai arereng mama ejai Egeresat, kanu araun ebishop arai general overseer, arai icebore, etunganan ece loepol kotoma orionget.

Asesen, karaida, konye, isesenijo, akongu naka aiyuun itei kuju naka ngun. Ido iseseni jo awasiake kokwap kangina, na, ebalu Edeke ebe ibore ngin kere eponio amudiar. Aiyuun, akongu ngin naka emorukalet, kikiari jo kuju adepar ngun, ido ianyuni jo moi, mere lolo, kosodi aseun konyarai okoku loka Aburaam.

60 Parao, komameatar kaiyuun, abu kosesen idwe luka Edeke kwape "luilamara." Komamei aiyuun, abu kitarau ngul ibulesin naarai mam ngesi akuriana nuabala ngol. Mam ngesi ayongit Edeke. Aomit ngesi ebe erai ngesi edeke. Aomit ngesi ebe ikedekesio lu ejaanakini ngesi, ebe arai ngesi ebishop, arai ngesi ekaanyanaran lokapolon, ikedekesio kes apotu kiswamata ngun. "Aibo ejai ibore kane ejai Ibore yen

*kane*," aso abu do ngesi kitarau ngul ibulesin. Abu kokienar kes, ka aboliar kes. Kwape apotu itunga kiswamatar lolo, ibore ngipengin becebec.

Abu aiyuun naka Musa kosesen ngul kotoma akwap naka aisumunet, itunga luisirerengitai. Emina araun ejie loetiono noi kanu ayangaar kes laiye toma aisumunet, konye abu Musa koseu alosit nepepe kakes. Epone loapedoria ti eong aipet mama ejaasi ngun, konye euta akapak adaun. Ianyu?

61 Koany, epedori acepak araut ibore yenetiono aibelokin itunga ngul. "Ibusakinit jo alosit aiboi kakesi, iburai jo araut idiopet kakesi, ido eraasi kesi sek luecobe adam mam jo ipedori aijangakin kesi. Iany? Konye ibusakinit kojaun icebore etakanuni kokinga kangina. Ibusakinit kojaunos nukapedor nakomoyo itodiaro kakonyenekec. Ebuni araut ibore yenetiono. Epote iriongeta aigir jo, ido iboro lu kere epote atakanun. Erai ngin nasogim noi, ngin naiburai jo aswam, konyeca kiswamau do jo aseunetekon."

"Arai eong idiopet kakesi." Eebo. Abu aiyuunike kiswama ngun. Abu aiyuunike konoku. Eebo, ipa. Abu ngesi koany ngin. Arai ibore yenetiono ayangaar kesi toma aisumunet ngin, konye abu ngesi koyanga aseuneteke alosit nepepe kakes, karaida biai. Komam apod ngun nuapotu kesi kiswamaikis ngesi, arai inyo apotu kesi kogirokinata ngesi, abu ngesi kolot karaida biai. Ajai nges alomar kinga nepepe kakes.

Kwana amuno eong iutasi yesi aisiom. Mam ace. Alosit nepepe kakes, karaida biai. Aitaraun, araut idiopet kakesi, erai ngin abeit, naarai erai aswamukon nges ngin. Epedori bo araut ejie loetiono, ido kipu nuebeit aitor toma, konye kolot karaida biai.

62 Konye abu aiyuunike kingarenik ngesi ayangaar aseunet naka Akirot, ido mere amwekimwek. Abu ngesi koyanga Akirot. Ngun kes nuabu aiyuun naka Musa kiswama. Na esesenia aiyuun nukarokok kakere nuka Edeke...kiitunito, ena kane amwekimwek kwana, akwapin, neikiara kakere, ekabaka loka akwapin. Ido aibo kejaasi lukEdeke lukesumunitai? Aipany naka alupot, ikerwatak kalupot lupetai.

Konye naabu aiyuun, na engolekinio Aiyuun nukarokok kakere nuka Edeke, eyangaari ngun kwape nuikiara ido koraas nuketiai adepar nukajokak kakere nuepedorete akwapin aitodiar. Eebo, ipa. Na engolekinio aiyuun ngun, naepedoria aiyuun aanyun ngun, naepedoria aiyuun Akirot aanyun Akirot itodiaritai, eraas ngun nuepolok mamakec itia amwekimwek kere ka nuka araut bishop ka nginibore ice kere yeni ipedori jo ener nukeng. Aiyuun iswamai ngun. Iany? Ipedori jo aanyun nukarokok kakere, luemwangitai, luengeritai, lupe kere epedori ngin araut; kinye koraun nukaronok keng kakere, kwabo eyangaari aiyuun ngun araut nuikiara amairon emilionit itia nukajokak kakere nuepedorete akwapin aitolomun. Amen! Epone ngol nges kiwoio oni ekosio ngol, "Ayangaari eong erot nepepe ka idis luka Ejakait luemwangitai." Iany? Oo, ikatuan!

63 Naarai, teijo, aiyuun itei ngun nuekoto Edeke kiswamai. Oo, amuno eong karai nu kolomasi toma. Aiyuun mam eseseni apak na kopekwana. Mam aiyuun eseseni nu *kane*. Aiyuun eseseni nuekoto Edeke, ido iswamai kotupite ngun. Ngun kes iswamai aiyuun. Eseseni nuekoto Edeke, ido ngun nuekoto Edeke kiswamaunai, ido iswamai aiyuun kotoma kangun.

Erai aiyuun aitapoet naeseseni-neelwana. Mam ijiesuni aseseneke. Esalit itei neipimatai. Amen! Ekadiian edio kere ejeni ngun. Ebe, erai neelwana. Erai ainwaket na-erai e telescope. Erai e binocular, ebe mam jo iseseni neyapie *ne*. Mam jo itwasamai binoculars kanu aanyunia nanyoin apak era; teijo, mam jo itwasamai ngin. Konye itwasamai jo binoculars asesenia neelwana.

Ido iswamai aiyuun ngun. Elemuni Edeke binoculars nuka Edeke, ngun kere, iwaitin kere, Aitutuket Nakitetet ka Namojong da, kosodi aanyun nginiisumunet naabu Ngesi kijaik. Ido eseseni aiyuun ngun kokinga kalaije, ido eseuni aiyuun ngun komam apod ngun nuebalasi nuejaasi kopekwana *kane*. Eseseni nges awasia. Mam nges ijiesuni aseseneke aite koipone *kalo*. Eseseni ngesi kinga laiye. Ediikinit ngesi kiding naka imusalaba yen kainuaket cuticut toma Akirot. Ngun kes iswamai aiyuun. Ngin nges aiyuun naejai toma naka etunganan loiswamai iboro ngul.

64 Kwana koany. Nuanyarit Parao, nuka anyaraunio, nuanyarit Parao *nukapolok*, abu Edeke konyarite "nuketat!" Parao tikepedo atemar atiar, "Kongolek, Musa, ne, kanukinyo, ijo nges irai parao loetupakini. Eong-ekopakini eong ebela lo mamakon nanyounio eong kane. Ekopari eong ebela lo. Erai lokon. Iany? Kwana, eraasi nu nuepolok. Ibuni jo araun etunganan loipol, Musa. Ibuni jo araun ebishop. Ibuni jo araun *nu, ngun, arai kwa*. Siri kijalak isio. Kosal jo nepene." Konye, koany jo, abu ngesi konyara ngun *nuepolok*, kwabo kobala Edeke ebe kerai ngin "naketat!"

Kwana, yes angor koomoomoata adakika adiopet, kwangin da, yes ikiliok. Nuenyaritosi akwapin ebe *nukapolok*, enyarit Edeke "asiilianut." Mam kereka ebala Ebaibuli ebe "Erai naketat aberu ainap anapito naka ekiliokit?" Ido iwomit jo ebe ilai jo iswamai ngun. Ianyu? Iuta bon jo aitodiarit akuan naka aberu kanuka ajokit, ido kes ngun bon. Aso, kinyek aswam ngun.

Kosodi yes ikiliok luijarete kotupitos iboro lukakwapin, ido einos ka atunanar akaulo kanu! Kosodi yes ikiliok luimameotor katiting nailesikino kamakus aijaikin angorokus ka iboro aijal aswam ngun, ileic mamakus! Ido kereka yes anyaraikina bonik ebe iras odwe luka Edeke? Etakani bala loko Sodom kama

kang. Iany? Mere aimading aipupukus, konye alimokin yes Abeit. Erai amina na itetenaari. Erai duc ngin. Toto namam epodokinit ikekoku, kosodi aiteten ngesi ka aibapanar nges, ka aijaikin nges apodokinit, mam ngin erai toto kanuka ngin. Erai ngin nakabeit.

65 Kwana, ido kosesen nuiswamaunos kwana. Abu Musa koany nu, kanuka aitapoeteke. Kosodi Parao atemar ebe, "Eraas nu nuepolok." kotema Edeke atiar, "Erai naketal." Aso Edeke...abu Musa koseu nuabala Edeke.

Kwana, koany, eseseni aiyuun ngun nuekoto Edeke jo asesen. Iany? Eseseni aiyuun ngun nuseseseni Edeke.

Kosodi airwananar ka apupeta esesenete ngun nuekotosi akwapin ijo asesen. Koany airwananar, "Kanukinyo, erai bon apupetai naka itunganan. Erai bon akirot ebe *nu...nu* kes...Ee, mam kereka *nu* cut eraas nuejokuka?" Iany? Erai ngin becebec, naitwasama jo apupeta ngun nuipagagaara kanejai Akirot, teijo, kanen do ngun kes nuekotosi akwapin jo asesen.

66 Konye mam aiyuun eseseni ngun. Eseseni aiyuun ngun nuabala Edeke. Iany? Ijeni jo ibusakinit jo acakun kwap airwananareta.

Airwananareta, apupetai naka airwananar, eseseni ngun nuekotosi akwapin ijo asesen: ediini loepol. Eebo, irai tope jo Ekristayot?

"Oo, arai eong Presbyterian, Methodist, Lutheran, Pentekostal, kinyo bobo ice. Arai eong *na, ngin,* arai *ya,* teijo."

Ngun, eraas ngun apupeta.

"Arai lokokanisa kalosodit, teijo. Oo, arai eong Catholic. Arai eong *na, ngin,* teijo."

Ibala jo nen. Kwana, ngun, eraasi ngun apupeta. Ielakinit jo atemar kwangin naarai erai ngol ediini, ibore ice yenepol.

"Eebo, isio kijaar kimeeban luipu, aapikin, aitelekaar ekanisa ece kere kotoma akwap, teijo. Isio..."

Konye ejai Ekanisa ediopet bon loteni, ido mam jo ilomari tomaKeng. Kiuruunio jo kotomaKeng. Iany? Ido arai kiuruun jo kotomaKeng, iswamai do Edeke lokajaran aKeswamisio kotomakon, ido kojai aitejenaar Elopel. Iany? Nen nges iboio Edeke, kotoma OkanisaKe. Elosenene Edeke Okanisa nginipaaran, ejari cut kotoma Okanisake. Ejari Ngesi kotomakon. Ijo nges EkanisaKe. Irai jo EkanisaKe. Ijo nges Ewema loiboio Edeke kotoma. Irai jo Ekanisa loka Edeke lokajaran, ijo ilopet. Ido arai ejari Edeke lokajaran kotoma yenikajaraniKe, apolouke do aswamisioit kon erai naka Edeke; arai mam apolouke emamei Edeke kotoma kanen. Mam Ngesi tikijaiki jo aswam kopone kangol, kobala ngesi kane kotoma Akirot, epulaan Ke, "Siri kismama ngun," kwabo kolosi jo aswama ngun. Teijo, ibiroro ngin. Naingerio jo ngin, itodiari do ngin ebe emamei da ber Aijar ngin kotomakon. Iany? Erai ngin nakabeit.

67 Abu aiyuun kingarenik Musa toma osokot loka arimaanut. Koany, Musa abu kismama...Ejai Parao lokatumunan, ejai Musa lokatumunan, kesi luarei kere ejaatar ka arereng. Abu Musa koany amorosit naka itunga, kosodi aimarakin ngin kwape abar naepol itia kere nukejaatar Misiri. Kosodi do ngesi, ingarenikinit aiyuun, abu ngesi kotupak nuabala aiyuunike kotoma Akirot, ido abu kingarenik ngesi toma osokot loka arimaanut, kawasia do toma Aibuses, amamus atwanare, mam cut atwanare, kotoma Ajakut naka Edeke. Asesen ka apupeta, apotu kingarenikis, ka amwekimwek, apotu kingarenikis Parao toma atwanareke, ka amudiaro da naka Misiri, akwapuke, ido mam kere ngin ikwarunitor ageun kapak kangin.

Aso konye jo. Kingolek *na,* itwani jo. Kingolek Ngin, ijari jo. Kwana koseutu yesi. Ibore ngipengin abu Edeke kibwaik akonyen nuka Adam ka Keba, kotoma omanikor loka Eden. Iany? Kanuka aiyuun, ibusakinit jo aseun.

68 Kwana koany, abu asesen kingarenik Parao toma atwanareke, ka amudiaro da naka eibuga ke.

Musa, nepepe ka aiyuunike, mam cut abu kokurianar Parao. Iany? Mam nges apodo nuabala Parao. Mam nges apodo nuekamunitos Parao, kwape da mam totoke ka papake apodokinitotor aitukurianetakec. Na etigogongikinere Musa mamake, ido arai ngesi etunganan ngol loabeit alakun e Misiri...arai aingarenikin Isirael alomun kinga ko Misiri, mam cut ngesi apodo nuabala Parao. Mam ngesi akuriana ngol. Amen, amen, amen! Ianyutu yesi nuabala eong?

Emamei akurian kotoma aiyuun. Ejeni aiyuun nuikamunitos ngun. Aiyuun, kwape duc enerar eong, ejaatar ka amoori nuepolok oni, ido ecekit atorob. Abala aiyuun ebe "Kililing kanen!" ido ngitunganan kere erai aililing. Kes ngun bon. "Ajeni eong neajai eong!"

Luce kere kotomakec etemarete atiar, "Eebo, apolouke, acepak iswamaenene ngesi." Iany?

Konye iburai ijo anyoun aibwo kosodi aitodiar amoori kon. Kes ngun bon. Aiyuun iswamai ngun.



69 Koany, Mam Musa abu kokurianar Parao akaulo na Edeke aitogogong anyaraunioke. Na eyuunia Musa ebe anyaraunitai ngesi kanuka ngun, konye naalimokinia Edeke nges kokuju kangina, "Erai kwangin," kosodi abunore kwap ka aitodiar da kakonye nuka Parao, ka luce da kere, lueyakiaritai ngesi aswam ngun, mam Musa abu kokurianar Parao.

Koany, abu Parao kitwasam akecoa kama ajai Musa, karaida. Kosesen. Kobala ngesi ebe, "Mere kalimok jo adis, eswamauni eong acamanar kede jo." Akaulo na aiticaneta ainyam kadokor nges, kosodi atemar, "Eswamauni eong acamanar ka jo. Kolototo yesi komaata motimot, apaarasia auni. Kolototo nepe etia nen bon siri kikunyakis adepar nen." Konye, ijeni jo, e...Arai ngun apupeta nuka Parao apotu kolimokis nges ngun, teijo, "Kolototo nepe etia nen bon siri kikunyakis adepar nen."

Mam kereka oni kija kepone ngol lolo? "Arai bon kiloma jo toma okanisa, ejok nen."

70 Konye, ijeni jo, aiyuun najaatar Musa mam eyuunit ediini loka "kanua-kopana." Abu ngesi kotema, Kilosi isio kere. Kilosi isio erot kere." Erai ngin nakabeit. "Kilosi isio toma akwap naka aisumunet. Mam cut isio kilosi kinga ne ido adukun erionget, kasodete apalar. Kilosi isio ainyikokin alosit kiton." Amen. "Ajai eong enyikokinit alosit kiton akwap naka aisumunet. Abu Edeke kisumun isio."

Imwasi ai lua Parao ebwote lolo kotut, ikapolok luka iriongeta! "Kwana, arai bon kiswama jo nu, kosodi aswam ngun, kodaun. Eebo, teijo, ne etia nen bon."

Konye Musa abu kotema, "Oo, mam! Mam, mam! Mam, mam!" Ianyu?

Kotema Parao atiar, "Eebo, kanukinyo mam? Arai ikotosi yesi ajaut kede ediini kwa kangol, mere eong kalimok yes nukiswama: Kolototo ijo bon kede imakio komaata, teijo. Ijo bon kede imakio kolototo komaata. Naarai ipedorete yesi kere ajaut ka ediini loikoni nen, konye sirikiyangasi otunga."

71 Ijeni jo nuabu Musa kolim? "Mam ejaun karaida ber emagegeret loesalakini kau. Kilosi isio erot kere! mam eong alosi dimikito kelototo kesi. Ido, alemar bon najaar eong ne, ajai eong akaninikon." Amen. "Mam eong alosi arai mam kesi da epedorete alosit, ido kes ngupengun bon." Oo, ebulesit bo lolo loetiting biai! Amen. "Akoto eong ayangaar kes nepepe kaeong. Bon ebe naarai adum eong ngin, ido eboie eong ido konyet atiar, 'Eebo, kwana, erai na naejokuna'? Mam, ipa. Kikoto isio itunga, da. Nginitunganan kasio iburai alosit." Amen. Kotema ngesi atiar, "Mam isio kijalakini karaida nginimerekek, arai idiobore, kokau. Mam ejaun emagegeret loejalakinio kokau. Kilosi isio kere toma akwap naka aisumunet." Amen!

"Nginidiopet kasio! Arai irai aberu naedukokina, arai irai jo ipese yenididi, arai irai jo aberu naemojongit, arai ekatumunan, arai emojong, arai ibore kere yenipe irai jo, iburai oni alosit, karaida biai. Mam ejaun idiopet da kaoni yenejalakinio kokau." Amen. "Nginidiopet kaoni ebuni alosit, ido mam isio kilosi airebokin idiobore." Abeit ngin. ikatunga! Idiinin ngul kanen ajaasi epeganakinis ne teniteni kangina, mam kereka? Oo, ikatuan!

Mam, mam Musa eyuunit ngun kotoma lo kane ediini loka "kanu-akopana bon". Mam, mam nges eyuunit ngun. Huh-uh. Eebo, ipa. Oo, ikatuan!

Kipedori oni asalakin toma ngun apaaran kere, konye ibusakinit eong adolokin toma akirotoka akaulo kapak naedit kasodi ageun alimonokin.

72 Koany, koany na, epone loibusiar! Oo, amina eong nu. Ijenete yesi, kawasia do konyet, abu Parao kotema atiar, "Konyoutu!" Abu Edeke kitican nges, kede eporoto loka Musa. Abu ngesi kinom nginibore kere. Abu ngesi kiswama nginibore kere yen kiburai aswam. Abu ngesi kitobwou e...abu ngesi kitoloma akolong, kiding paaran. Abu ngesi kiswama nginibore ice kere. Abu ngesi-kisirion apaarasia. Abu ngesi koyangau aidodokai, icuc, ilac, nginibore ice kere, akim apuru, ka atwanare okaliake, ka nginibore ice kere. Abu ngesi kiswama nginibore kiton, kawasia do konyet, koraun Parao atemar, "Konyoutu! Koyanga kere luijaatar, kosodete alosit." Oo, ikatuan! Kituritete Edeke!

Eyalama eong noi ebe epedori etunganan aijaanakin Edeke cut kiton ngol, ajokit, akurwokin ajenun nuiswama kanuka ngol. Erai ngin nakabeit. Abu cut korima Edeke kaileleba kiton ajokit atemar, "Oo, ikatuan, konyou kolot! Mam eong akoto bobo aipup ngun." Erai ngin nakabeit. Ipedori jo aswam ngun, kaileleba kere.

73 Koany kwana, korai mam Edeke aigangit Musa, ti ngesi keraun loekienare. Konye ajai Edeke nepenen cut, euta aitogogongit. Nginibore kere yen abu ngesi kolim, abu kitodolikin.

Ido abu koraun Parao aiting aiboisitike, naarai arai ngesi ebishop, ijeni jo, kanukangun ajai ngesi asalakin nen. Mam ngesi apedori aipeg. Mam nges apedori atemar mam, naarai ajaasi ngun iswamasi. Iany? Mam ngesi apedori-mam nges apedori aipeg ngun, naarai ajaasi iswamasi. Aso kawasia do abu ngesi kotema atiar, "Oo, konyoutu cut! Mam bobo eong akoto aipup yes bobo. Konyoutu kane! Koyangaasi ikusiboro kere, kosodete alosit! Oo, ikatuan!

74 Kwana kidumuni oni Musa, kane, akaulo Edeke aswam nuetia nen kanuke, ido adaunit aitodikin nges

aanyuneta ka nukaumokin da nui pu noi. Kwana, kanu adakikan atomonakany nuetupakinete, kapetata do oni nu kwap kane. Ido kosesenata ejok noi. Abu Musa kodolok aibois na neabu ngesi...

Kebu Edeke ketemarite atiar, "Ajai Eong kajo. Akirokon erai AkirotoKa. Adau eong aitogogong ngun mamakon, Musa. Ijo, neamaeotor icuc kakwap, mam kerai apakikec, ido ibu jo kotema, 'Kopotu icuc,' ido apotu icuc kopotu." Erai ngin asubun. Ingai epedori ayaun amuton toma akwap, kilema Edeke? Abu ngesi kotema atiar, "Kojaun amuton," ido abu amuton kojaun. "Ibu jo kotema, 'Kojaunos aidodokai,' ido apotu aidodokai kolomasi kiton da otogo loka Parao, toma aperito, ido na apotu ngul kiculiata ngun toma atukono nuapolok noi." Ekasuban! "Ido abu Eong kener kotomakon, Musa, ido abu kainak Akakirok aisub kotoma akituk kon. Kaitebeikin ketarau Eong ijo edeke kakonyen nuka Parao," Eebo. ipa. "Eswama Eong nu kere."

75 Ido kane kodolunete kesi aibois ace, abu aitemisioit naedit kotubun, ido abu Musa kogeu aimony, "Dobo do eong aikwaikin ai?"

Akoto eong yes koanyutu. Erai na akirot nakisisiauna naepol noi kane kwana. Amina eong na, koany. Koany, Musa, arai kisiomit oni kane ejok, ebe Mo-...Kapak, naageuniata idwe luka Isirael akurianar, apotu kesi koanyutu Parao etupakinit kesi, kotoma okokoro loka aswam.

Kebu Edeke kiswama nginibore ejok kaitekooro. Kwana abu Ngesi kitegeik kesi kotoma alositekec. Adau Ngesi atukokin ekanisa nepepe. Keponi konyaraunai kes kinga. Alomunitosi kesi kotoma ngolidiini. Apotu kesi kotukokinos kere nepepe. Kebu Musa kobongo ngina, ido kobala, "Ejakait, anyoika ibusakinit eong aswam?"

Kotema ngesi atiar, "Eebo, kilosi isio aswam nu". Mam ace, ape bo yesi. "Kwana, Musa, ijeni ijo abu kereka Eong kanyarau jo aswam nu."

"Eebo, Ejakait."

"Mam ace, kolot jo kiner nu, ido ejaunos," kane kopote icuc. "Kiner kanuka nu," ido kane kobuni ngin. "Kiswama nu," kane kobuni ngin. Nginibore arai EBALA EJAKAIT KWANATA, EBALA EJAKAIT KWANATA, EBALA EJAKAIT KWANATA! Kwana aloma ngesi toma ationis...

76 Ido kobala Edeke, "Kwana adau Eong aitegeikin kesi alositekec. Adaun kesi kere anyaraun kinga. Ejai ekanisa nepepe, aso adau Eong aibwaikin kes toma alositekec. Kwana, Musa, kotuboror do jo kesi. Adau Eong aicorakin jo. Ebeit ber eong aibokin kasodi aiyengun apak edit."

Kobala Musa, "Wu Ejakait, kongolek ebunit, elo Parao ebunit! Itunga kere...Anyoika ibusakinit eong aswam? Anyoika ibusakinit eong aswam?" Koany jo kanen, mam kereka cut eraas itunga ngul? Eebo, ipa. kogeuni aimony, "Anyoika ibusakinit eong aswam?"

Kane kianyuni oni Musa itodiarit, kaileleba einono loka etunganane, duc akote Edeke kojai kaukon aremit jo toma ibore ice. Kwana oni ngul lolo. Ikoto jo Edeke, akaulo na oni asesen ngun kere nukidau oni asesen, konyeca koroko jo ikoto Edeke aremit jo aswam ibore. Ianyu?

Kebu cut Musa konaikinite kanen, atiar, "Edeke, alosi kwana eong aingit Jo, aanyun nuilimuni Jo. Ee, ee, kolim Ijo ngun. Eebo, mam ace, alimuni eong da ngupengun." Ianyu?

Konye kane kedaunit Edeke adakakin nges kanuka aswam kangin, kitogogongite da ebe ajaasi Ngesi kede ngol. Kwabo do ngol lo kane, adolu ejautene ece, ido konyet ngesi ageun aimony, "Anyoika ibusakinit eong aswam? Ejakait, anyoika apedori eong aswam?"

77 Kwana kiitunitosi yesi, kedaunit ber ngesi aidwar kane sek, naarai kelimunit ngesi ebe, "Imisirian luianyunete lolo mam bobo ianyunete." Kosodi konyet kanepakanen kogeuni aimony, "Edeke inyo bodo kipedori isio aswam?" Ianyu? Akaulo na nges aismama aswam nakajokan kotoma aidwar kanen. Koany jo, kebu ngesi kolimok ngul nuapote atakanun. Arai ajai Akirok naka Edeke tomake, kejai Ngin tomake. Ido naenerar ngesi ngun, apotu kaitebeikin kiswamaunos. Nuabu ngesi kolim araas sek nuapote atakanun, kwabo nges lo kane emonyi, "Anyoika alosi eong aswam?"

Oo, arai ca nat mam erai itunga ngul! Arai ca nat mam erai eong ngol! Arai ca nat mam erai eong ngol! Ianyu?

Kedaunit sek Ngesi aitogogong, "Nuilimu jo epote aismamaun. Ajai Eong kajo."

Ido kane abu ejautene kotubun. "Anyoika ibusakinit eong aswam? Anyoika ibusakinit eong aswam, Ejakait? Hei, Ejakait, aibo ijai Ijo? Hei, iirarit Ijo eong? Anyoika ibusakinit eong aswam? Kwabo kedaunit sek Ngesi adakakin ngol, ido abu kitodia nges, ido abu kitogogong ka aswam da nginibore kotomake. Ido kane, "Edeke?" Oo, ikatuan! Kaileleba cut itodiari, ekoto etunganan aiyeng ido ajalakin Edeke aswam nuka aremit.

78 Ido, kereka, ajeni ngesi ebe enyonyoikinit Edeke ngesi kanuka aswam kana, aswam nu, ido kebu Edeke kitodia kaica alimunetaKe. Kerai apak nakibusakinitor alakun itunga. Edeke, kotoma aswamisiKe nukapedor ka aumokineta, abu kiriu kes kere atukokin nepepe toma ogurupu ediopet. Itupitosi yesi eong? Abu koyau kesi kere nepepe kotoma ogurupu ediopet, aitodiar alimunetaKe. Abala Naiwadikatai kwangin; ena kane aanyunet, ajenunet na kane, nginibore kere yen abu ngesi kolim. Konyet do kobuni ngesi kidingikec kwape enabi. Duc, kere nualimuni ngesi, abu Edeke kijaik angosibib, da ber asubun ka ayaun da icuc, ido ayaun iboro toma ajakut. Ido nginibore kere yenikisumunit Ngesi ngol, kane abu Ngesi kiswama ngin.

Konye akoto ngesi aidarit EBALA KWANATA EJAKAIT. Ianyutu? Ebusakininit ngesi ti aijen ebe aitodiario naka anyaraunioke kwape nakabeit obe kerai EBALA KWANATA EJAKAIT. Akeswam nadakakininit nges kerai EBALA KWANATA EJAKAIT. Ipedosi yesi adumun ngin? Hmm! Kanukinyo bo edaritor ngesi EBALA KWANATA EJAKAIT?

79 Akoto ngesi, "Ejakait, inyo apedori eong aswam? Kane adau eong ayaun idwe lu kinga ne, aojau naetia ne. Ajaun ne ejautene, ebunit Parao. Elosete lu kere atwakare. Anyoika kwana ibusakinit eong aswam? Anyoika kwana ibusakinit eong aswam?" Hum! Hum!

Adaunit ngesi sek alimor nuapote kesi aswam. Adaunit ngesi alimun cuticut inyo, aiswama ngun. Abu kolimo sek awasia naka ateker alopet obe na etopolounere ngesi. Amuno eong imisiikisi yesi. Huh? Adaunit Musa sek atemar atiar, "Mam bobo yes ianyunete kes. Elosi Edeke amudiar kes. Aboliatar ngul yesi adaun apak naeoj neilesikino. Ebuni Edeke amudiar kes." Adaunit ngesi alimor sek ngun nuapote atakanikin ngul.

Ido konyet, "Ejakait, anyoika ibusakinit eong aswam?" Iany einono loka etunganane kanen? Iany? "Inyo ibusakinit eong aswam? Alosi eong aidareun EBALA KWANATA EJAKAIT." Eebo, ipa. "Abuni eong aanyun nuelimuni Ejakait, kasodi konyet eong aswam ngun." Huh!

80 Kiitunite, abu kojaun parao lomam ajeni Yosep, ijeni jo, kotoma apak kangin, cuticut kapak kangin. Ianyu? Iany? Ido abu Musa kobwo kosodi alimor sek awasia naka ateker kangin.

Ido kane ajai cut ngesi aiboisit ne abeitor ngun atakanun, kogeuni do bobo ngesi aimony, "Inyo ibusakinit eong aswam, Ejakait? Inyo ibusakinit eong aswam?" Ianyu? Mam kereka erai eitunganane ngol? Mam tope ngol erai einono loka itunga?" Huh!

Adaunitai nges sek, adwarakin. Abu Edeke kijaik angosibib mama ajai nginibore kere yenabu ngesi kinerite, ido anyaraunitai nges kanuka aswam kangin, aso kanukinyo abu ngesi kotemaria atiar, "Inyo ibusakinit eong aswam?" Ajai eipud; kerai bon nukeng alimun nuka ngin. Akoto Edeke Musa aibwaikin ainakinet ngin naka aiyuun, naabu Ngesi koikinite ngol, toma aswam. Adaunit Edeke aitodiar ngin. Arai ngin Abeit.

Ido akoto Edeke Musa , akoto itunga, aanyun ebe ajaasi Ngesi ka Musa.

Kosodi ngesi, kokau kanen, aidarit: Atiar, "Kwana kereka, Ejakait, arai bon eong imukeru, kolimok do Ijo eong kwana. Ee, alosi eong aswam nu. Kijaar eong ka EBALA KWANATA EJAKAIT."

"Onac, erai ngin EBALA KWANATA EJAKAIT?"

"Eebo, eebo, Onac Musa, erai ngin EBALA KWANATA EJAKAIT. Ee."

"Eebo, kidumu oni ngin kwana, EBALA KWANATA EJAKAIT."

Ido abu ngin kiswamaun. Mam cut abu kotwania aiswamaun karaida apak adiopet. Mam cut abu kotwania.

Ido ngin na kane kotoma ojautenesio, kotakanuni bobo. Kwana ejaatar Ngesi kangol elosete. Adaun sek ekanisa anyaraun kinga, ageiki kes alosit, ido ejaasi kesi edokarete. Ido kogeuni Musa aimony, "Ejakait, erai tope erai na EBALA KWANATA EJAKAIT? Anyoika ibusakinit eong aswam?" Mam ace.

81 Akoto Edeke Musa ajaut kaiyuun, naabu Ngesi kibwaik toma, kotoma ainakinet naabu Ngesi kitodiarite ejok noi kwape nakabeit. Kedaunit Edeke ejok noi aitogogongikin Musa ka itunga da ebe arai Ngesi, kanuka Akirok ido kanuka iboro lualimunono aitodolinikin. Kerai nakitejenaritai ejok noi. Amamei bobo eipud lo ngesi aiyalongong nuka ngin. Ianyu? Amamei bobo nges aoomoom idiobore yenika ngin, naarai adaunitai ngin aitacaun sek. Kedaunit ngesi sek aswam iboro lu. Ido kedaunit ngesi sek aitogogong, kanuka icuc ka iidep, ebe abu kinerak iboro toma asubunio, ebe ajai Akirok naka Edeke tomake.

Aso kane ejai ngesi alosit aingit kwana nukiswama, najaatar ijautenesio eperete cut koingarenike. Ianyu? Oo, ikatuan!

Amuno eong kolomasi cut noi nu mamawok, ido ipedori oni aanyun nekijai oni. Ianyu? Mam kereka ngin kijaikinit jo aipup apolus *ngin?* Aomoom nuka Musa alimonor akalanyanutoke, kasodete angolekin nuwok. Eebo. Ianyutu?

82 Ngesi lo kane, ebwoi kanen, teijo, kojene ebe abalasi Nuiwadikatai ebe kerai ngol nges esawa ka apaaran da kanuka ngun aiswamaun, ido kojene ebe eriamuna Edeke kanges kotoma Opir loka Akim. Ido abu Ngol kolot cut kwap akonyen nuka itunga kosodi aiswama aswamasio nu nukapedor. Ido nginibore kere yenalimuni ngesi, abu kiswamaun, karaida toni ayaun iboro toma asubunio. Aswam iboro lu erai Edeke bon tikepedo aswam. Aitodiar ebe eporotoke kerai eporoto loka Edeke.

Ido ajai ne ejautene kede itunga ngul luajai ngesi aitopoloun, ayangaun toma akwap naka aisumunet, ido ajai ebwoi, komonyi, "Anyoika ibusakinit eong aswam?" Erai ngol etunganan, ekoto bon...

Kwape Onac Roy Slaughter, eyuunit eong iboie ngesi kokinga naka ekek kangina, abu kolimokinia eong kadiopepak, nuka icetunganan iswamai icebore mamaka. Kasodi eong atemar, "Ee, abu eong keswama *nu*, kwana da erai ngun."

Kobala ngesi, "Onac Branham, kojalak kesi kogongakinos okeperikon lolo, ido moi eraun ijo ainap kesi." Ido epone ngol nges ejaatar itunga. Agongakin okeperikon lolo, ido moi koraun jo aigangit kes.

Nges bo ngin, erai ngin nges ajai Musa aswam. Arai Edeke aigangit nges erot kere akaulo na Nges aisiboikin ngesi kosodete da aitogogon ngin aswam ngun. Ido ebusakinit ti itunga etemartitos atiar, "Musa, kolim akirot. Abu eong kaanyu ijo iswamai ngun *kangina*. Abu Edeke kitopolo jo kangina, ido ijo nges ngopengol lolo." Amen. Ianyu? "Kiswama ngun!" Amen. Ebusakinit ngesi ti kojene ngun, konye mam ngesi abu. Mam ace. Kwape cut kejaatar kapak kangin, kopekwangin kwana. Kianyuni oni, ngun. Aso abu Ngesi kotema atiar, "Mu-..."

83 Iburai apotu ngun kilesikinos Edeke kwangin. Iburai abu kopasata Edeke akiro ngun. Abu Ngesi kotema atiar, "Kanukinyo imonyia mama Ajai kanuka ngun? Mam kereka Eong adaunit sek aitogogong aitijenunioKa? Mam tope eong kalimokinit jo ebe abu Eong keyaku ijo kanuka aswam kana? Mam kereka Eong kalimokinit ijo alosit aswam nu? Mam kereka Eong esumunit ebe abuni eong aswam nu, ebe abuni eong ajaun ka akitukukon, ido abuni Eong ener kotomakon kasodi aswam nu, ido ibuni jo aitodiar aanyuneta ka nukauumokin da? Mam kereka Eong abu kesumunite aswam ngun? Mam tope Eong abu keswama bebec cut, ka amudiar da lokasurup kere kamakon? Ido ijo lo ebwoi kokinga kane kwana, kAngolol Nakarengan, cut kotoma okokoro loka aswam ido ijai imonyi neajai Eong. Mam ijo iriamuna kaEong? Akurwoki jo aanyun ebe eyakunit Eong jo aswam nu?" Oo, arai tope mam ngol erai etunganan! Ikatuan! Aso iburai kepotu kepasata akiro ngun Ngol noi.

84 Ido abala Ngesi, "Ijeni jo ebe ipuda jo ngun. Ijeni jo ebe arai iburai jo ayangaar idwe lu laiye toma akwap ngin naka aisumunet, erai ngin bebec, kigolokinitai jo ne okoona, emamei bobo ibore ice yenipedori jo aswam. Aso ejai eipud. Nubonyoika imonyia jo neajai Eong? Iseseni bo jo Eong kanukinyo? Kanukinyo kiworotor jo Eong? Mam kereka eong etogogongit ngin mama ejaas itunga? Mam tope eong etogogongit ngin mamakon? Mam kereka eong anyaraunit ngin? Mam kereka ngin erai Naiwadikatai? Mam kereka Eong abu kesumun ayangaar itunga lu toma akwap ngin? Mam kereka Eong abu kanyarau jo ka alimokin da jo abuni Eong aswam ngun? Mam kereka Eong abu kanyarau ka alimun da ebe keyakiarit Eong ijo aswam ngun, ebe mam kerai jo, kerai Eong? Ido abuni Eong aijesar kasodi ajaun ka iponokon, ido kere nupe ilimuni jo, abuni Eong aitodiar ngun ka aitogogong da ngun. Mam kereka Eong eswamat ngun?"

"Ido konyet naebunio idiobore yenipetai, kanukinyo iswama jo bala imukeru? Ibusakinit jo korai etunganan. Kiner kaitunga,"

amen, "kosodi alosit kingaren!" Amen. Aso konye jo. "Siri kimony. Kiner!" Amen. Oo, alelakinit eong ngin. "Nubonyoika imonyia jo neajai Eong? Kolimok itunga ido kolototo kingaren toma alosikinetekus. Nupe kere erai, arai erai adeka, arai ibore kere yeniperai, aitajarun lukatwak, arai ibore kere yenerai ngin, kiner! Adau Eong aitogogong ngin. Kiner kaitunga."

85 Nakisisiauna bo na! Nakisisiauna bo na, oo, ikatuan, kotoma adoketait na naka alosit nekibwoia oni. Kongolek nekijai oni kwana, eebo, ipa, k'Airiunet Nakiuniet. Koany, kijai oni cut nepene okek, loka Abunore naka Ejakait.

Enyonyoikinitai ngesi kanuka aswam kangin, kwabo koringa idarit EBALA KWANATA EJAKAIT. Iburai apotu koupata Edeke ngun. Abu kotema, "Siri kiyatak aimony. Kiner! Keyakiarit Eong jo."

Wu Edeke, nuibusakinit Ekanisa ti araut atupuruc na! Nepepe ka aitodiaret naka Edeke naitekoro, nepepe ka Epir loka Akim ka aanyuneta ka nukauumokin, nginibore kere kwape cut ajaar kotoma apaarasia nuka Sodom. Abala Ngesi ebe abuni ngin abongun.

Ena kane akwap kotoma ojauteneke. Ateker ngin kanen kotoma ojauteneke. Angor ngun kanen kojautene kangol. Engul kanen ikiliok kotoma ojautene ngol. Engol kanen ekanisa kotoma ojautene ngol.

Engin kanen nginibore. Iboro, aanyuneta, iboro lueporitos ka nginibore kotoma akuj, ka iboro luetiono ajenun luka iponesio luegelegela, ka angolol egata, akailan nuka akipi, ejai etau loka etunganan euta apalar aswam, akurian, apak naka aburun, ican kotoma atekerin, ekanisa euta aibiror.

86 Ido etunganan loka adiakar euta aikeun, loitopoloro elopet adepar kere; ngol loenyaritai Edeke, ngol loiboie kotoma oyekalu loka Edeke, itodiara elopet, oo, ikatuan, ido adau abunore ateker na. Kwabo arau ekanisa erionget, ido kes kere atukokinos nepepe, kwape amalayan mama ejai nadote, ido nginibore kere becebec kotoma orot adoteu.

Adoteu, inyobo erai ngin? Alimonokin angor ebe epedorete aitub ikecetim, alimonokin angor ebe epedorete anapit ipalei, alimonokin ikiliok ebe epedorete kesi aswam *nu* ido epedorete kesi aswam *ngun*; kosodi ikalimonokinak, iswamaete kesi *nu*, ka eijiri loitojokitos itunga ka iboro. Mam kereka yes isesenete, erai aswam adoteu kede Akirot nakabeit naka Edeke!

Ido ejukaki Edeke oni AkirotoKe nakabeit, namam erai naka ediini, emamete ka aunoi nuenikinitai neejai Ngin, kosodi ainakin oni Epir loka Akim, Emoyo Lokalaunan lo ajaunos kaoni kwana adaun ikar akaisauni. Ido nginibore kere yen abu Ngesi kodwarite ido kolimunit, abu kitodolikin becebec kopone loabu Ngesi kismama ngun.

87 Kiner kaitunga, kasodete oni alosit kingaren. Amen. Kijaar oni ka alosikinet, erai ngin Aibuses. Kewotokisi oni mama Kangin. Kilosi oni Akwap naisumunitai. "Epedoros akiro kere kama ejaas ngul luiyuunits." "Kiner kaitunga. Mam tope Eong etogogongit ngun? Mam tope Eong abu kacamak da aputoKa ainomario kokidingikus, ka nginibore ice kere, ido abu keswama nginibore kere yen tikepedor aswam, kanu aitogogong ebe kija Eong kajo? Mam kereka magazines, isabitin idis luatuboros, iwadikatai akirot ngin tomakec, naibu ijo kineria kane kotut nuti epote aiswamaun kokinga kane, ido ilapio iuni eringa apak ngin, ido kanen abu kolot aitodolikin ka aitodiar? Karaida ber sayanis ejeni nuikamunits ngin. Kanginibore kere yen eswama Eong, kwabo iringa jo idaret. Kiner kaitunga kosodi alosit kingaren toma alosikinet kon." Amen.

Mam kereka Natan abu kolimok Daudi? Natan, enabi, kadiopepak iboie, koseseni Daudi ekabaka loenyonyoikinitai, abu kotema atiar, "Kismama kere nuejaas otaukon, naarai ejai Edeke ka jo." Abu kolimok Daudi, "Kismama kere nuejaas otaukon. Ejaas Edeke ka jo."

88 Enyonyoikinitai Yosua aikamar akwap kanuka Edeke ka itungake. Auriana apaaran. Epuda ngesi apak naiyatakina kanuka aswam kangin na enyonyoikinitai nges ka aiyakiar da aswam. Yosua, etunganan, enyonyoikinitai nges. Abu Edeke kolimok nges, "Kwape kajaatar Eong ka Musa, ajaunos Eong ka jo." Amen. "Akwap ngin, alosi Eong ainakin kes. Ido akoto Eong jo alosit laingol kosodi alemar Imalekain, ka Iki...luce kere, Ipilistian ka Iperesin, kaluce ngul kere luegelegela, kolema kes kinga. Kija Eong ka jo. Abuni Eong...Emameun itunganan kere yenedepori abwoikin jo apaarasia kere nuka aijarakon. Emameun itunganan epedori aitapas jo. Kolot kingaren toma ngina."

Ido abu Yosua kout ekileng ngol kosodi atiar, "Kotupata eong!"

Ido abu ngesi kodoka ngina, ido ngesi lo kane ajai ejie. Ido kerai bo inyo ngin? Abu ngesi kisiarisiar lukasurup. Keraasi kesi luetukonokina ibunget idio kalailo kosodi ibunget idio kalaingol. Naedolunio apak naka akuare, ti ngul kere kimorikikinos nepepe kosodete aibwo nepepe, ido abunore kede agogong naepol adepar asurwokin nges. Ido ajai akolong ejotakini. Epuda ngesi aica naiyatakina. Ajai akolong ajotakin. Mam nges abu kokukokin kosodi atiar, "Ejakait Edeke, keswama anyoika? Keswama anyoika?" Abu kiner! Ajai nges eipud. Abu ngesi kotema, "Akolong, kobwou!" Mam nges abu komony neejai idiobore. Abu ngesi kicorak, "Akolong, kobwou! Ejai eong eipud loka nu. Arai eong ebulesit loka Ejakait, loinyonyoikinitai kanuka aswam kana, ido ejai eong eipud. Kobwou, ido siri ijo kica...Kosodi, elap, kopaik ikaja kanepi ijai jo," kitoni nges adaun ejie ka aitelekaar da ibore ngin cut kere. Ido abu akolong korima nges.

89 Emamei aimony. Abu ngesi kolimok akolong, kotema, "Kobwou. Akolong, kosal ikaja kanen! Ido, elap, kosalak ijo nepe ijai jo." Mam nges abu komony, "Ejakait, kwana inyo ibusakinit eong aswam? Kiyatak ainakin eong aica naka akolong." Epuda ngesi aica naka akolong, aso abu ngesi kicorak ngin, ido abu akolong korima nges. Oo, ikatuan! Abu ngesi kicorak akolong abwoun.

Samson, inyonyoikinitai, abu konyou, kebu Edeke kisiboik, ainakinitai ainakinet naka apedor, arai ngesi loesiboikinitai amudiar ateker naka Ipilistian. Isiboikinitai, aponi kouriai kotoma akwap, inyonyoikinit Edeke, kanu amudiar Ipilistian. Kosodi kapaaran adiopet apotu kikamutu ngesi kokinga komanikor, komamei ekilengike, komamei akwara. Ido abu elukumit loka Ipilistian ngul luanapitos lujiis kokubokinos nges kapak adiopet. Abu tope ngesi kokukokin kwap kosodi atiar, "Wu Ejakait, ajai eong edarit aitapoet. Wu Ejakait, anyoika ibusakinit eong aswam? Kitetenik kwana eong nuibusakinit aswam?" Ajeni ngesi ebe ajai nges eipud. Emamei idiobore yen abu ngesi kodum kilema akoit naka abokony naemojongit naka asigiria, ido abu ngesi kodany Ipilistian elukumit. Amen!

Mam nges abu komony neejai Edeke. Abu ngesi kitwasam ainakineteke na enyonyoikinitai. Ajeni ngesi

ebe eyakunitai nges kanuka aswam ngun. Ajeni ngesi ebe auruunitai nges kanuka ngun. Ajeni ngesi ebe enyonyoikinitai ngesi kede ainakinet, ido abu ngesi kiperik Ipilistian elukumit kwap. Mam nges abu komony nejai Edeke. Abu Edeke kodakak ngesi ido abu kitogogong ngun kwape nukabeit ebe kerai ngesi, kanuka iboro ice lukiswamat sek ngesi. Ido etogogongitai ngesi kwape lokabeit, ebulesit loka Edeke, lokinyonyoikinitai, amudiar Ipilistian, ido abu ngesi kismama ngun. Mam nges abu kingit idiobore. Kerai ngin akeswam, ebe ajai Edeke iswamai kitorite tomakeng, abu kidep akoit nakabony naka asigiria ngin kosodi ageun aipot Ipilistian. Epone lo...

90 Kanukinyo, ainomet adiopet bon kede abore kangin, airiikin abulukukio nuka akwes ngun nuka aisiinit inch ediopet-ka -atutubet kopone *kangol*, ti kisiarisar akoit ngin toma atutubeta elukumit. Ido kereka abu ngesi kinomonon ngun elukumit, ido abu koar ngul, kosodi asalit ebwoi kotingite ngin kakanike.

Mam abu kingit aingiseta. Mam abu komony. Abu kiner. Abu kosur ngul. Oo, ikatuan! "Kolema Epilistiat, apedori eong alemar Ipilistian, Ejakait? Ajeni eong ebe ijukunit Ijo eong aswam nu, Ejakait. Eebo Ejakait, ajeni eong ebe ijukunit Ijo eong amudiar ateker na naka Ipilistian. Kwana ne ejaasi elukumit kakesi irigaunito eong, ido emamei ibore kijaar eong. Inyo kereka alosi kwana eong aswam, Ejakait?" Oo, ikatuan! Emamei ibore alosi aitapas nges. Inyonyoikinitai nges kanuka aswam. Emamei ibore epedori aimusung jo. Mam, karaida ibore idiopet. Aleluya! Abu bon ngesi kolem ibore yenajaatar kosodi aitotwa kes kikunyi da nepekec. Erai ngin nakabeit.

91 Neabu lokasurup kobwauna nges toma, kobala, "Kwana kidumu oni nges egoloritos arwatatin, kidumu do kwana oni nges. Kidumu oni ngesi ejai toma kede aberu na. Kwana kidau oni agolokin ekek, kere airimun nginiibois, ido mam nges epedori alomar kinga. Kidumu oni nges."

Mam Samson abu kodelo aimony, "Wu Ejakait, alukakisi kesi eong toma kede arwatat na nakediini." Huh! "Uh, anyoika kwana alosi eong aswam? Adau eong aimorikikin kede kes. Anyoika kwana alosi eong aswam?" Mam cut nges abu kismama ngun.

Abu bon ngesi kosuenyik alomar kinga, kosodi ariongakin erute okeperike, kosodi asuenyikin alosite kede ngol. Amen! Enyonyoikinitai nges kanuka aswam kangin. Anyaraunit nges Edeke. Mam abu kogolok nges toma. Mam, teni cuticut! Abu kibwoko irutei ayangaar nepepe kanges. Mam nges abu kilip kanuka ngun. Mam nges abu kingit Edeke arai aismamaun ngun araibo mam. Eraas ngun nu cuticut ajaas toma okokoro loka aswam. Amen, amen, amen! Cuticut toma okokoro loka aswam. "Kanukinyo imonyia neajai Eong? Kiner, kosodi alosit akonye!" Amen! "Siri kimony. Kiner!" Adau ngesi anguurian ka adoorian kwana. Ibusakinit kwana komojongite do neilesikino kanu ener. Erai ngin nakabeit. Ajeni ngesi ebe ainakinet keng ngin naka apedor apedori amudiar epilistiat edio kere loebwoi koingarenike. Amen.

92 Konye mam oni kijeni ngun, teijo. Kiringa oni irai imukerun, ido kede ecupa kotoma akituk wok.

Ajeni ngesi ngun, ajeni ngesi ebe abu Edeke kitonyou nges kanuka alosikinet kangin, ido amamei ibore yen alosi abwoikin nges, apaarasia kere nuka ajarake. Amamei ibore apedori amudiar nges. Arai ngesi loetonyounitai kanuka alosikinet kangin, bala Musa. Emamei ibore ebuni airebokin nges. Emamei luka Amalek arai icebore yen epedori airebokin nges. Ejai ngesi orot alosit toma akwap naka aisumunet. Ajeni Samson ebe ajai ngesi orot.

Ajeni Yosua ebe ajai ngesi aikamar akwap ngin. Arai ngesi loetodiaritai kwape lokabeit. Esumunit Akirot naka Edeke ngun, ido ajai Emoyo Lokalaunan nen itigogongit ngun kwape nukabeit.

93 Ajai ngesi orotoke, aso amamei ibore alosi abwoikin nges korotoke. Mam, cut. Cuticut kokoro loka aswam, nepepe kEdeke, amamei ibore alosi aibwo korotoke. Aso abu cut ngesi kout irutei kosodi ariongakin ngul okeperike, alangir na ikiloi ilukumin iwongon arai ikany, kosodi alosit adokar kuju orongat ido kiboikin kujukec. Emamei ibore elosi aibwo korotoke. Ajaatar ngesi kede ainakinet na enyonyoikinitai naabuni kama ka Edeke. Mam ngesi eburai aimony, "Ejakait, keswama eong anyoika?" Arai ngesi lo adaunitai ainyonyoikin aswam ngun. Kerai ngin EBALA EJAKAIT KWANATA, "Komudia ngul!" Aleluya! "Komudia ngul! Ketonyounit Eong jo kanuka alosikinet kangin." Amen.

"Keswama anyoika, Ejakait? Mam ace, inyo bodo alosi eong aswam kane kAngolol Nakarengan?"

"Mam kereka Eong alimokinit jo ebe ainakinit Eong jo emoru araut aanyunet kane? Ibuni jo abongun omoru ngol, ido ilosi jo ayangaar idwe lu toma akwap ngin. Mam kereka Eong abu kanyarau jo kanuka alosikinet kangin? Inyo iyalongongo jo kanuka idiobore kere yen ebwoi korot? Kiner, ido kogeu alosit!" Amen ido amen! "Ee, abu Eong kanyarau jo kanuka alosikinet."

94 Daudi, ajeni ebe arai ngesi loenyonyoikinitai, ido arai loetodiaritai kwape ekenoman esaba lokajokan. Ajenete ngesi ebe ajenete kesi arai ngesi ekenoman esaba lokajokan. Arai Daudi loenyonyoikinitai. Ajeni ngesi ngun. Ido nabwoia ngesi koingaren naka Goliat, mam ngesi abu kodelo aimony, "Wu Edeke, anyoika ibusakinit eong aswam kwana? Kopala ber, ibusakinit eong...ajeni eong nuibu Ijo kismama kotoma apakio nuatuboros. Ijo, ibu Ijo kocamak eong aiar edubu, ido ibu Ijo kocamak eong aiar engatuny. Konye ido bodo Goliat kokinga kane?" Huh! Mam cut nges abu kismama ngun. Abu bon ngesi kiner. Anyoika abu

ngesi kolim? "Ibuni jo aputokin kakes...?..." Abu ngesi kiner kosodi alosit kingaren.

Mam nges abu kilip ailipasit. Mam ngesi abu kijaik idiobore. Ajeni ngesi ebe enyonyoikinitai nges. Amen. Enyonyoikinitai nges, ido kebu aporocet ngin kotakan erai ibore yenebecokino. Kiyuunit ngesi ainyonyoikinio ke. Kejaatar ngesi kaiyuun ebe apedori Edeke aitetenikin amoru ngin cut kiding naka aboko ngin kangina, neajai aibois adiopet bon napedori ainom. Ajai ngol ebwoi kanen.

95 Ajeni ngesi ebe arai ngesi ekenoman esaba loteni. Amen. Ajeni ngesi ebe Edeke abu kitarau nges loikoni nen. Amen. Ajeni ngesi ebe abu koar engatuny, ajeni ngesi ebe abu koar edubu, konye kerai ngun kede iboro luka papake loka akwap. Kane ejaas iboro luka Papake Lokokuju! Amen. Mam nges abu kokukokin, "Ibusakinit...Anyoika ibusakinit eong aswam kwana, Ejakait?" Abu ngesi kiner ido kobala, "Ikwaikini jo bala engatuny ka edubu, ido eong lo abu." Amen! Aibuses mama ejai Edeke! Eebo, cut. Abu ngesi kiner kosodi alosit kingaren airiamakin ka Goliat lo. Oo, ikatuan!

Komam apod ekesais! Arai ngesi ikesa yenedidi bala-koreng, ijeni jo. Mam ngesi apol noi. Mam nges atemelel noi kisesen, ikesa yenedit kosubite-bala ajai epone lope ajaar. Ebala Ebaibuli ebe areng ngesi. Kwana, komam apod ekesais ka nuebakai ebe apedoriteke aswam ngun.

Ijenete yesi, abu ebishop kolimok ngesi, kotema atiar, "Kwana kongolia ber jo ne, okooka, erai etunganan ngol loisisiat ediini. Iteiyo, erai ngesi ekajion. Eurunitai nges erai ekajion ido erai ngesi e...Arai lem ngesi ekajion, ameun keiditeuke; ido mam jo ipedori ngesi." Ido kobalas inacanake ebe, "Oo, ijo ibore yenikepali yen, ibunit kinga lailo aswam ibore kwa kangin, kolot kobongo ore."

Mam ngun apotu kijangakis nges. Kanukinyo? Ajeni ngesi ebe enyonyoikinitai nges. "Edeke loayuuni eong kama ajai engatuny ngol, Edeke loayuuni eong kabelekeka nuka edubu kangol, ebe adepar nen, eyuuni eong kama ejai Epilistiat ngol. Eong lo abunit. Kiriamakin eong ka jo Kokiror loka Ejakait Edeke loka Isirael." Amen. Mam abu ilip kiton; arai ngesi loadaunit sek ailip kiton. Abu Edeke kisilipite nges sek kiton eringa kepesikina apetetai naka akwap. Arai ngesi loenyonyoikinitai kanuka aswam kangin. Kiburai nges ener kosodi alosit kingaren. Ngun bon kes nuabeit aswam kanuka ngun, bon ener kosodi alosit kingaren. Oo, kerai bon ngun kes nuajaasi kanuka ngun. Oo! Mam nges abu...

96 Kanuikamunitos inacanake lukidiinin, ikesekeleok ngul ebwoete kanen, kesi da, ijenete bo yesi. Oo, eebo. Abwoete kesi kanen kobalasi, isekelete ka kokienatar, ido kobalasi...inacanake, ijenete bo yesi, ido kobalas ebe, "Ah, ah, ah, mam jo ipedori. Ijo, irai bon ijo yeniwongoono." Mam ngun apotu kijangakis nges nepetai da. "Ikoto jo ebe aitegelikina kama kaluce. Ikoto bon jo aitodiar." Karai ngin korai aitodiar, ti erai kwangin. Konye apotu bon kesi kosesenata ewai loka adam.

Ajeni Daudi ebe ajai akinyet naka ainyonyoikinio mamake. Amen. Mam abu koyau aitegelikinet adio kere mamake. Abu ngesi kotema atiar, "Epilistiat ngol eputokinos bala edubu ka engatuny, aso eong lo kane abunit." Abu ngesi kolimo ngun sek eringa ngun ketakanuna. Inyo kereka abu ngesi kiswama? Abu koar edubu. Abu koar engatuny. Abu kocakak engatuny kwap kede...Kede kinyo? Kede ka-kede aporocet, kosodi aiting ekileng, kosodi konyet edubu. Engatuny, abu ngesi koar engatuny kede ekileng. Ibore ngipengin abu kiswamaik Goliat. Abu kibirok ngol kwap kede amoru, kosodi autun ekekileng, kosodi atubor akekou elopet, kanepakanen kakonyen kangun. Inyo abu ngesi kolimo sek eringa etakanuna? "Ido ibuni jo aputokin kakes." Kanukinyo? Abu ngesi kiner akirot ebe abuni araut, kosodi alosit kingaren kanu aitodolikin ngin. Amen. Oo, onac! Abu ngesi kiner, ido abu kikama ejautene apaaran ngin.

97 Arai iiritor apak ajaun naibusakinitor etunganan ener, erai kwana. Abuni agolokin kotoma adakikan adis nuetupakinete arai bon ipedorete yesi angirikin adakikan adis bobo. Kijaar eong ka iboro ice iwadikatai ne, Nuiwadikatai nuakoto eong aidol tomakec.

Petero mam abu komony, naadumunia ngesi etunganan loaajaatar kaiyuun na elesikino kanu aitangaleunio, eperi korute loenyaritai Lokajokan. Mam nges abu kokukokin kosodi ailip adaun akuarekere, ido, araiboot ailip naka apaaran-kere, ailip nakaojan, naepol, ido atemar atiar, "Ejakait, elipit kwana eong Ijo ebe kingarak ber Ijo etunganan lo engwalas. Aanyu eong ebe ejaatar ngesi kaiyuun. Ajeni eong ebe erai ngesi ekuyuunan. Ido adau eong aingit ngesi, ido ngesi...abala ngesi ebe ejaatar kaiyuun, ebe iyuuni ngesi nuabu eong kalimok nges. Ido alimok eong nges nuikamunitos a...nuikamunitos nuiswamat Ijo, ido eong aomit eong kwana, Ejakait, ebe...Ipedori Ijo ainakin eong EBALA KWANATA EJAKAIT kanuke?"

Mam, ajeni ngesi ebe arai ngesi ekiyokia loenyonyoikinitai. Ajeni ngesi ebe abu Yesu Kristo kiyakiarite ngesi: "Kitangaleunenete lukadekak, kitajarunenete lukatwak, kiswaganarete lukatapon, kirenganarete ajokin. Kwape kidumuniata titai kwape kwangin konakis da titai." Abala Ngesi, "Petero, kolot kiswama ngun!" Mam bobo kipuda nges ailip kiton. Arai ngesi loeyakitai.

98 Abu bo ngesi kotema ai? Abu kotema atiar, "Kokiror loka Yesu Kristo!" Abu kolim Ekiror loka Yesu Kristo, ido ajai etunganan ngol eperi kanen. Kosodi ngesi aikeun ngol kakan, ido kobala, "Konyou kobwo kakejekon!" Ido abu ngesi koting ngol kanen aitodol nadumuniata akojo nuka ikuurunyuke agogong,

kogeuni ngol atemel alosit. Kanukinyo? Mam nges kejauna toma airiamun naka ailip na kuare-kia. Mam nges abu komony mama ajai Edeke. Ajeni ngesi kaileleba kere, kama kopon luka Yesu Kristo, enyonyoikinitai ngesi kanuka aswam kana. Eebo. Abu ngesi kiner kosodi aitonyoun ngol, naarai ajeni ngesi enyonyoikinitai nges ekiyakia kanuka alosikinet kangin.

Itunga luaperete kotoma otoribe keng mam apotu kotemasi atiar, "Oo, kobia, ekiyakia Petero, komony kanukosi, kosodi kilip kanukosi ailip nakaiyuun, mama ejai Edeke." Mam, mam, mam cut kes apotu kolimutu ngun. Ajenete kesi ebe arai ngesi ekiyakia loka Edeke loenyonyoikinitai ido kitodiaritete kwape lokabeit. Aso apotu kesi kotemasi atiar, "Kaperoto bon oni kotoribeke. Mam ipuda ijo alimun adiokiro. Kijeni isio ngun. Kiyuunit isio ngun." Aijar nakotoma kec! Mam ekiyakia apedori adolore mamakec cut. Kwabo kesi, ikulepek, eraasi ewai loka ngun.

99 Kobala Musa, "Mam erai eong bon alosi. Kilosi isio kere." Ejai oni kere ibore ibusakinit aswam. Ibusakinit oni kere kinyonyoikin.

Ido apotu kesi kosesenoto ekiyakia ngol ebwoi kanen, ido apotu koanyutu ngesi itangaleuni etunganan lokadekan ka aswam da iboro luabu ngesi kiswama. Ejenete kesi ebe mam ngol apedori adolon mamakec. Kotemasi, mam kes apotu kotemasi atiar, "Petero, kobia kosodi aijaikin ailip, kosodi aidareun aitodol naidumunia jo EBALA KWANATA EJAKAIT, kosodi abunore alimokin eong. Koany ber nuebala Ejakait." Apotu kesi kotemasi atiar, "Karai bon oni kapedosi aper kotoribeke, naarai Edeke jepeje lojai toma naka Yesu Kristo ejai tomake, ido kiseseni ibore ngipengin iswama. Aso apotu kwi kotirosi atwele naka elou loka Yesu ido koperoto kotoribe loka Yesu, ido kereka ejai Yesu toma otunganan lo. Arai ketakanu etoribe ngol kosodi arapar oni, kingalaeuni oni."

100 Ido ebala Ebaibuli ebe nginidiopet kakesi aponi kitangaleunoi. Amamei airiamun naka ailip naka akuare-kia, atemar, "Ejakait, arai kalot eong apero kotoribe loka ekiyakia kalo?" Mam, ajenete kesi ngun. Kebu Aica ngin kimiliaik kes. Eleleba ikecetaunon. Abu aiyuunikec kalacakin. Amen. Apotu kesi kiyuutu ngun. Keanyunitos kesi ngun. Iitabalan luka Paul, opone ngopengol.

Kwana, kotoma agolokin.

Mam Yesu abu komony nayangauniata kwi etelepat lokemoyo lokaronon mamaKe, ngol lokejaatar ka ipum, aibironokin akim. Mam Ngesi abu kotema atiar, "Papa, arai eong OkokuKon, aso kwana ibu Ijo kiyakiu Eong ne aswam *nu-ka-nu, ka nu*. Apedori kereka Eong aitangaleun etelepat lo?" Mam nges abu kolim. Abala Ngesi, "Kolom kamake, Satan!" Abu Ngesi kiner kongaleuni etelepat.

101 Naeriamunotor Ngesi ka Ajore, loajaatar ka ajokin ilukumin iarei kotomake, mam arai Yesu nges abu komony. Arai ajokin kes amonyete, "Arai ilosi Ijo airengear isio kinga," oo, ikatuan, "kocam kalomasi isio toma osipan ngol loka ipegei."

Mam Yesu abu kotema, "Kwana, Papa, apedori kereka Eong aswam nu?" Abu Ngesi kotema atiar, "Kolom kotomake," ido apotu ajokin kokerata. Cutibo, ajeni Ngesi ebe arai Ngesi Mesia.

Kates naka Lasaro, kedaunit ngol apaarasia aongon etwanit. Apotu kesi kotemasi atiar, "Arai Ijo kojai ne, Ejakait, mam ti nges ketwana."

Kotema Ngesi atiar, "Arai Eong ajarun ka Aijar da." Amen! Mere aibo, wori, araiboot biai. "Yeniyuuni Eong, karaida ketwana, konye ejari bobo." Amen. Ajeni Ngesi ingai kerai Ngesi. Ajeni Ngesi ibore yen kerai Ngesi. Ajeni Ngesi ebe arai Ngesi Emmanuel. Ajeni Ngesi ebe kerai Ngesi ajarun. Ajeni Ngesi ebe arai Ngesi Aijar. Ajeni Ngesi ebe kotomaKeng eboie aileleba naka Edeke kakuan. Abu Ngesi koany itunga ngul ludidik kanen, ido kebu Ngesi koany ngun nualimokinit Edeke nges aswam kapak kangin, ido Ngesi bo ngol ajai nen. Abu ngesi kolot aijesar kwap ngina.

Mam cut Ngesi abu kotema, "Kwana, kidareu, akukokin Eong kwap ne. Yes kere kokukokinos kwap kasodete ailip." Abala Ngesi, "Iyuunit jo ebe apedori Eong aswam nu?" Amen. Abu Ngesi kingit kanuka ngun.

Mam kerai Ngesi; kerai ngul. "Eebo, Ejakait, eyuunit eong ebe irai Ijo Okoku loka Edeke loebeit abunore toma aakwap." Oo, ikatuan! Kane aponi kitijenaarai Ngesi. Ibusakinit icebore aiswamaun.

"Lasaro, kolom!" Abu Ngesi kiner, ido abu etunganan loatwanit kolom. Mere ebe "eong apedori?" Abu bon Ngesi kiner. Naeriamunotor kaiyuun, abu ibore kotakan.

102 Kiner Ngesi, abu Ngesi kiner, ido apotu imudukiok kokwenyutu, apotu ingwalasik kotemelata alosit, apotu ikimingiok kiirasi, apotu ajokin komonyata ka alomun da kinga, aponi lukatwak kitajarunai, nginibore kere. Kanukinyo? Mam Ngesi abu kilip kiton. Arai Ngesi loenyonyoikinitai araut Mesia. Kerai Ngesi Mesia ngol. Ajeni Ngesi ebe arai Ngesi. Ajeni Ngesi aiboisitiKe. Ajeni Ngesi ibore yen eyakunitai Ngesi aswam. Ajeni Ngesi ebe adaunit Papa aseun Ngesi araut Mesia ngol, mama ejai ikeyuunan. Ido nakiriamunotor Ngesi kede ikeyuunan ngin yenikejaatar ka aiyuun, abu bon Ngesi kiner Akiro. Apotu ajokin



kiweliwelunos. Eebo, ipa. "Kiner! Sirikimony. Kiner!" Amen.

Ido ajeni Ngesi apedorosioKe nukeinakinit-Edeke, konye oni mam kijenunit. Ajeni Ngesi ibore yen arai Ngesi. Oni mam kijenunit.

Abu imurwok Musa. Ajeni Samson. Ajenete luce. Ajeni Yosua. Abu imurwok Musa. Abu koraun Edeke aisiitikin ngesi ngun. Kobala Ngesi, Kanukinyo imonyia jo neajai Eong? Abu Eong keyakia jo aswam epelu ngol. Kiner, kosodi alosit kingaren toma apeleikinet kon. Abu Eong kalimok jo ebe ibuni jo omoru lo. Koyanga idwe lu kosodi aingarenikin kesi aiyatakin alosit. Kiner ener bon. Mam Eong apodo arai inyo ejai orotokon, kolema ngin kotoma orot. Ejaik eong jo apedor aswam ngun. Abu eong kener...Ibu jo kiner icuc ka iidep, ka isuban, ka ibore lukepone kangol. Kwana kanukinyo ideloria jo neajai Eong? Kanukinyo ibunitor jo neajai Eong, iworot iboro lu? Kiner ener bon kosodi aanyun ngin ikunyakini, kes ngun bon." Oo, ikatuan! Oo, epone loaminar eong ngin!

103 Kane, Yesu, nginibore kere yen abala Ngesi, enera bon Ngesi Akiro, ido apotu ngun kikwaikisi nen. Adaunit Edeke ejok noi aitodiar Ngesi kwape OkokuKe. "Lo nges OkokuKa lominat loalelakinit noi. Kiirasi yesi Nges."

Kosesen Nges. Alelakinit eong na. Epone lo katitingu naepol, epone loabwoia kwape loka akabakanut kakonyen nuka lukecaakaKe. Amen. Abala Ngesi, "Kotiyakisi eyekalu lo, ido abuni Eong ailip Papa kasodi aanyun nuiswamai Ngesi kanuka ngun?" "Kotiyakisi eyekalu lo, ido adukokini Eong nges, apaarasia auni." Mere amuno Eong; abuni Eong aitam." "Abuni Eong aswam ngun!" Kanukinyo? Abala Naiwadikatai kwangin.

Naiwadikatai ngipengin na abala ebe abuni Ngesi aitajarun akuanaKe, abu koinak oni apedor, Apedor. Amen! "KokiroriKa irengeararete ajokin, inerenenas angajepa nukitetiak; arai ikamunenete imunuo, arai kemata ibore yenikaaran, mam isiriebi kes cut; arai kidokokis lukadekak akecekanin engaleunete."

"Kanukinyo imonyia neajai Eong? Kiner, kosodi alosit kingaren." Oo, katitingu noi eong...

"Kotiyakisi eyekalu lo, aduki Eong nges bobo."

104 Oo!

Ido kiitutu kwana (kijai oni agolokin.), kerai Ngesi ngopengol. Kerai Ngesi loabala, kotoma Yokana 14:12, e... "Yenikyuuni Eong, iswamai ngesida aswamasio nueswamai Eong." Erai ngin nakabeit? Arai Ngesi nges abala nen.

Kerai Yesu, kotoma Marako 11:24, nges abala, "Arai *kilimok* jo erongat lo," mere, "Arai *kilipata* yesi mama ejai erongat lo." "Arai *kilimok* jo erongat lo, 'Koukor,' ido komam ibunonokin kotaukon, konye kiyuunite ebe ngun nuinera jo edolete, kiswamaikinio." Kwana jo, arai kisosolikin jo ener bon, mam ebuni aiswamaun. Konye arai ejai ibore kotomakon, yen ebe irai jo yen inyonyoikinitai kanuka aswam kangin, ido ejenuni ebe erai akote naka Edeke aswam ngun, ido kosodi alimun ngun, ebuni ngin aiswamaun. "Arai yes..."

105 Kerai Ngesi kenera nu. "Arai isalito tomaKang, AkiroKang da esalitos tomakus, kilipata nuikotosi kere ido kiswamaikinio." Oo, ikatuan! Oo, ikatuan! Ianyutu yesi nuabala eong?

Kitimoi na, konye euta cut aikeun kotomaka. Ibusakinit eong alimun nges. Kerai Ngesi nges abala, apaaran ngin kama, kotoma amagoro ngin, "Emamete ijo itiang." Ido abu Ngesi kosub ikunyukoi iuni ebwoete kanen kakonyekosi. Inyo ngin? Erai bon ener akirot, atiar, "Epote ngul ajaun *ngina*, ka ngina, ka *ngina*," ido apotu ngul kojaunos nen. Arai Ngesi nges abu kiswama ngun.

Charlie, Rodney, arai Ngesi kokwap kangina ko Kentucky; ka Nellie, Margie, ka luce da kere. Arai Ngesi, Edeke ngopengol loajai kau ngina kosodi ener neajai Musa, kobala, "Kanukinyo imonyia jo neajai Eong? Kiner akirot!" Arai Ngesi nges abu koyau kes toma ajaut. Erai Ngon. Erai Nges. Oo, ikatuan!

106 Arai Ngesi abu koinak aitapoet bala ekaru ediopet loatubor, ngin na abala kiponi oni alosit ngina, ido Aipuceta nu Akanyikaarei, kosodi epone loabunio ajaun agirokinet naepol na abuni aitegear ngun, ido apote kesi ajaun toma opone loka apiramid. Ido kangina Look mag-...Life magazine ejaatar kangin, ikaja karwatat kotoma kanen. Arai Ngesi nges abu kiner ngun.

Arai Ngesi, akuare ngin najaar eong alosi korot kasodi aanyun emun e mamba loti eapikinit aikony onaceka. Ido abu Ngesi kotema atiar, "Iinakinit jo...kiinakinitai jo Apedor aiwen ngesi, arai edio kere kotoma kaluciekek." Arai Ngesi nges abu kiner ngun.

Mama ejai aberuka na akwangu-akou ngin iboie kokau kanen: arai Ngesi atupuruc ngin, abu kitwekenyu eong kanen kotoma agola, kosodi aibwo kotoma okoona, kobala, "Sirikiyong aswam idiobore, arai alosit nenidio, arai alimun idiobore, naarai Ajakut namam cut-etwanianari naka Yesu Kristo ejaasi ka jo kaneilosu jo kere."

107 Arai Ngesi kokuju kalaije kotoma Sabino Canyon, bala ilapio iuni atuboros, najaar eong elipi, aomoomoi anyoika alosete atakanun. Ajai eong abwoi kangina, ido abu ekileng kocakakin akanika, ido abala, "Lo nges Ekileng loka Ekabaka." Arai Ngesi.

Arai Ngesi abu kotema eong atiar, "Kwape kolo ajaatar ka Musa, kwape kwangin keyakiari jo."

Arai Ngesi abu kolimok eong, ikar akaisauni kau, kokwap kocor kalaije, kwape itelepat yenididi. Abwoi kanen kwape ekalimonokinan lodidi, kocor, ikar akaisauni kau, abwoi kanen neabu Aica ngin, Epir loka Akim jepeje, kobunio kwap kokuju kosodi aibwo kanen, ido kobala, "Kwape abu Eong keyakiunia Yokana Lokebatsian aingarenikin abunore nasodit naka Kristo, ebuni Aisiiraretekon aingarenikin Abunore Nakiareit," mama ejaasi akwapin kere. Opone ali tikepedoror, na abu ekecokonika kokienar ka aitarau da ngun nukeyala? Konye apotu kiswamaunos becebec kopone kangol. Arai Ngesi nges enerit ngun. Eebo, ipa!

Oo, epone loaraar Ngesi abu kiner kotoma adwaranut, mam ejai aitapoet, "Epote aitodolikin."

Arai Ngesi abu kotema atiar, "Arai kejaun idiopet kokidingikus yen edwari, arai eanyuni aitapoet, kosodi alimun ngin, ido kosodi ngin aitodolikin, aso kereka kiitunitosi ebe mam erai ngol, erai Eong. Kija Eong kangol." Oo, ikatuan! Inyo mam ti eong kalosio akonye, kasodi atemar erai Ngesi, erai Ngesi, erai Ngesi!

108 Arai Ngesi abu kobu kwap, naalimokinia eong kesi ebe ajai Epir loka Akim kwap ngina kuku ocor, kwabo mam kesi apotu kopedosi aiyyun ngun. Arai Ngesi kokwap kangina kakidingos, na abu ekalimonokinan ngol loka Baptist, kakonye nuka itunga ilukumun akaisauni akuare ngin, ko Sam Houston Coliseum, na abu Emalaika ngol loka Ejakait kocamakinia aputoKe ainomario, ebwoi kanen. Arai Ngesi, ngopengol bian, lolo, ido kiton ikar kere.

Arai Ngesi abu kolimonori sek neapote iboro lu ajaun. Arai Ngesi nges enerit nu. Arai Ngesi nges abu kiswama iboro lu. Erai Ngesi nges ngopengol bian, lolo, ido kiton ikar kere. Eswama Ngesi nginibore becebec kwape abalar Ngesi ebe abuni aswam ngin. Amen.

Kanukinyo ibusakinitor eong aidareun? Adau Edeke aitogogong Akirot kwape nakabeit. Erai ngin Abeit. Kalototo. Kasuenyikisi alosit. Kolototo oni kotoma alosit naka Ejakait, keperikisi awai nukabuonokin kere, adiaakanareta kere. Kitalau etogo, kiswaga.

Kwape abalar aitapoet na Junior Jackson, amamei ibore edeuna kilema ataalai; arai airujasitike, arai iboie ngesi kane. Amamei ibore edeuna kilema ataalai, ido ajaatar ka aeneta nuka esabu kamakec, kotoma airujasit naabu ngesi koinak eong akuare ya. Oo, ikatuan!

109 Onac Collins, siri kiyalongong nuka agar kangin. Arai nakakwangan. Mam bon ijo ijene epone loitinget ngin.

Kiperikisi awai nginibore kere yenitepegit Ngin. Kiitunitos, erai na Abeit, komam apod arai esubit Ngesi bala nailamara biai, ka nginibore ice kere, kapakio ace. Kiyatak alosit akonye kede Nges. Erai Emoyo Lokalaunan. Edeke jepeje loetajaruni Yesu Kristo kokatwak, Ediopet ngopengol loepedori ainerun iboro toma ajaut, Ediopet ngopengol loajari kotoma apaarasia nuka Musa, nges ngopengol lolo.

AnyariteKe kotoma apaaran na nakawasia, etogogong Ngesi kwape nakabeit. "Kwape ajaar kotoma apaarasia nuka Sodom, kwape kwangin ejaunotor kotoma abunore naka Okoku loka etunganan." Adau Ngesi...Ejai Sodom kwap ngina. Ejai Billy Graham ka Oral Roberts kinga ngina. Ido ejai Ekanisa elosi akonye, kanuka aanyuneta kwapekwa nuesumunit Ngesi, aiboisio ngun kairotarit, kwabo kes ngun kanen. Erai Ngesi nges enerit ngun.

Wu Ejakait, koinkinai eong atiting, nges ailipika. Kingarak eong, Wu Ejakait Edeke.

Ejai eong ainyein kane. Aika esawa.

110 "Kanukinyo imonyia jo neajai Eong? Kanukinyo imonyia jo neajai Eong, kadaunite Eong aitogogong ebe kija Eong kajo? Mam kereka Eong etangaleunun ikadekak kus," ti Ngesi ketema. "Mam kereka Eong abu kalimok yes iboro luapotu kotakanut becebec cut? Ekecokon kus mam epedori aswam ngun. Eong! Mam nges epedori; erai ngesi etunganan. Erai Eong, Ejakait," ebe ti Nges kelimu. Erai Eong nges abu keswama nu. Erai Eong nges alimonokini nges iboro lu einer. Mam erai ngesi. Erai EporotoKa. Eong nges etajarunene lukatwak kus naibirokinotor kwap. Erai Eong nges etangaleunene ikadekak. Erai eong nges alimonori sek iboro lu eringa. Erai Eong nges eswamai nuka aitajar. Erai Eong nges abu kainak aisumunet."

Edeke koinak eong atitingu ketingia Ekileng ngol loka Akirot loabu Ngesi kibwaik toma akanika ikar bala akaisauni-kiuni kau, kasodi aiting Ngol ka alosit da kingaren toma Airiunet Nakiuniet, nges ailipika.

Ketuluroto akwesiwok.

111 Papa Lokokuju, aeka esawa, konye euta Akirot araun naketiai loepol. Kwape kisesenia, Ejakait, apak akaulo kapak, Ajakut namam cut-etwanianari naka Kristo iriamununos kasio duc. Epone lo emalator eong Ijo kanuka ajokisiKon! Epone loibu Ijo koyuunia isio ido arai...ka aisirereng da isio, epone lokimalator isio Ijo kanuka ngun!

Kwape etingitor eong iitabalan lu kakanika, Ejakait, erai itunga kes ejaas kaiyuun, kes iyuunitos Na. Korau nginijokit kere, nginideka kere naenyouni kama ka itunga kangul. Ido ecorakini eong ngolimoyo loejai toma ne, loerono, ido komam erai loka Edeke, ngolimoyo loka adeka, adekasinei kere ka aiticaneta. Mam isio kiperi kotoribe loka itunganan, na da timam erono, konye kijai isio otoribe loka Akiro Nukajokak, Akiro Nukajokak nuitodiaritai kwape nukabeit.

Kwape ejaar Epir loka Akim ngol lokapolon elosi abongobong kau ido kingaren kotoma otogo kalo, jepeje loabu Edeke kosesenio kwap kotoma, kosodi Angolol Nakarengan aijal ekerot, ido abu Isirael kitor toma. Konye kwana kwape esesenio Ngesi, ebwasitai kAokot nuka OkokuKe Kelopet Obe, kede kaitim ka asianut. Karaunos isio lu erimaaka. Kenyeis lolo isio ener, aikalalat aimony. Kajenutu isio ebe inyaraunit Ijo isio kanuka aswam kana. Lo nges esawa. Enera eong ngun Kokiror loka Yesu Kristo, konyou nginideka kolot kaiboisit kana.

112 Korau ngolikiliokit ka nginiberu, yeniworoi Ekiror loka Ejakait Yesu Kristo, kijaikis ajarakec irwan nakitetet lolo. Ejaikinit eong naka, wu Ejakait, kolutari loka ailip. Eperikin eong elopet kwap, kasodi aisurum eong elopet bon ileic ka aibelokin akakou asesen kwap neilemunia Ijo eong. Ejakait Edeke, kerumito eong ileic kanuka anonokuka, amamus aiyuunikang. Kisioni ngun, Ejakait. Koinak eong atitingu. Koinak sio kere atitingu.

Apupi eong bala Musa, kijai isio orotokosi alomar kinga. Mam isio ikoto ajalakin idiopet. Kikoto sio ayangaar nginidiopet, wu, Ejakait. Eraasi kesi luKon. Alimorit eong kes kanuKon. Kisirereng itunga lu lolo, wu Ejakait. Kocam koinak ngun. Ido kisirereng eong, nepepe kakes, wu Papa, ido eponio aiturit Ekonikiror. AibusesuKon eraun napeKon. Koinakinai sio aiyuun na naka Ikar Kere, wu Ejakait, kwape kijaikinor isio ikulepek bon mamaKon kwana.

113 Eong, kokuju naka Ebaibuli lo ido kokuju otut lo, ainakini eong Ijo akaijar, Ejakait. Ajai eong amunokina nginiisumunet naibu Ijo kijaik. Ajeni eong ebe eponio kesi aitogogong. Ajeni eong ebe eraasi kesi Abeit. Koinakinai eong atitingu kenerar Akiro nu. Koinakinai eong atitingu, wu Ejakait. Kitetenikinai eong kotoma nuabuni eong aswam ka ener da. Ejaikina eong elopet mamaKon, kede ekanisa lo, aupakin kanges, wu Ejakait, Kokiror loka Yesu Kristo. Amen.

Aiyuunika...kuju mamaKon,

Ijo imerekek ye Kalvari,

Edeke Eketajaran;

Kiira eong kwana elipi,

Kolema aronisioka kere awai,

Wu, kocamak eong agear kapaaran kana

Karau loKon kaileleba!

114 Kwana kabwoata,cut keililinga, kwape kiyokina nges.

...nejjai Ijo,

Ijo imerekek...

kekiarito akaniniwok kaju nejai Ngesi kwana.

Wu Eketajaran...

Ijaikinos ikulupek nejai Edeke kwana.

Kwana kiirarai eong kwape kelipia,

Kolema abunokin ka kere awai,

O kocamak anyoun lolo

Araun loKon kaileleba!

Kwana nepepe, kede akaniniwok kikiara kaju: [Kinyogokini atukos ailip na, akaulo Onac Branham.] "Ejakait Yesu ejaikini kwana eong elopet mamaKon, ajar naka aijaanakin, kede kasegaara naiyatakina,

kaiyuun naiyatakina, amonyi eong, ebe karau eong ebulesit loecamunio kotoma aijaraka naebunit, itia nearaar eong kotoma aijar ngin naatubor. Kisioni amamus aiyuuniteka, ido kinyakakinai isio toma aiyuun ngin naaponi koinakinai lukalaunak irwan atipet. Ejaikin eong elopet bon mamaKon, Kokiror loka Yesu Kristo.”

Kwana kwape kitulurio akwesiwok.

Najaar eong etorit ailogiloga namutonu naka aijar,

Ido kojai aiturur epesiara alukunite eong,

Koraun Ijo Loingarenikini eong

Kicorak amuton kibelokin araun apaaran,

Kilota akurianuka kere awai,

Mam icamakini eong apaar

KamaKon awai.

115 Kwape kitulurio akwesiwok kwana. Ipupi jo bala eswamaiki aisiiraret naka atupuruc ijo ajokis? Ainaki jo atitingu? Arai ikotosi yesi, ti kikiasi akaninikus mama ejai Edeke, kobala, “Edeke, kemalat eong Ijo.” Ekiarit eong akakanin kere, naarai apupi eong cut ebe erai ngin-engaraki ngin eong. Ainaki eong atitingu.

Iboro ice luenerit eong, mam eong aomit ebe alosi eong ener ngun, konye adaun ener. Arai aitoronet neajai eong. Abu eong kadumuna elopet mam ajai kopone lo aomit eong ebe eswama, konye abu eong kadumun elopet ekamunitos akiro nuka aimony nginipak kere, aibois na einer.

Edeke, kingarakinai eong, ameen kosawa kalo ape, ebe abuni eong araut ebulesit loijaikina adepar.

Mam eong elipi kanuka bon. Elipi eong kanukus, da, ebe, nepepe, kwape Akuan naka Kristo, na enyaraunitai alomun kinga kakwapin, ejai ekapanakin kanuka akwap naka aisumunet, ebe iinakini Edeke eong atitingu ener erot, aitacaun erot tetere ijo mam idiaki esokot. Kalimokini eong yes, kanuka asianut naka Edeke, abuni eong atupit ikukut luerengak Aokot luka Ngol lo abu kolot ageikin oni.

Ido ebwoki eong emusalaba loijaikinitai lo,

Kiton atwanare alacakin eong,

Kasodi konyet alosit ore, ainap aboko,

Ejai aboko kanukang.

Kijaikinit isio na mamaKon, wu Papa, aijaikin kosi, Kokiror loka Yesu Kristo, OkokuKon. Amen.

[Ageu onac ecie ener kangajep acie. Eorori atutubet na kotoma ateepeu.]

116 Kimalai oni Ejakait kanuka nu. Kolot kaijar naijaikinitai. Kopalikin ilopet kojalakin, toma ajijim, toma aitasiono. Kolosenenete kotoma Omoyo. Kolosenenete, kinerenenas, konapenenete, kismamaenenete kwape Ikristayon, kitasionos ido kojijim. Sirikicamakisi na araun naekurwoor kwana. Inera Eporoto loka Edeke kotoma Akirot, inera kotoma ainakineta. Kwape elomunia ainakineta adiofet, ejaun ecie alimor ngin, ebuni ainakineta acie kosodi alimor ibore ngipengin. Koany, erai cut ngin na eupasi kAkirot ido eupasi kesawa da. Ejai Edeke kaoni. Epone lokimalator oni Ngesi kanuka ngun! Kwana arai eok...

Ketuluritos akwesiwok, arai inaciwok kogeik oni:

Koyanga Ekiror loka Yesu ka jo,

Kwape ebuku kotoma nginiruja;

Ido naetukunotor acoduneta alukakin jo,

Bon kiyengu Ekiror ngol kotoma ailip.

Bon kismama ngun, kiner Akirot, kolim Ekekiror. Kayoikisi kwana oni kwape ejakare aitwar oni.

Koyanga Ekiror loka Yesu ka jo,

Kwape ebuku...ido kotoma ationis;

Kiinakini jo aiyalama ka aijamam,

Oo, koyanga ngol nginiibois kere nailosi jo.

Ekiror loketiai...

Kwana keyogaikinos kejangijangata akanin nuka idiopet kangince, katemasi, “Abuni eong ailip kanukon, onac, ido kilip ijo da kanuka.”

...Akuj;

Ekiror loketiai, (Ekiror loketiai!) O epone loejjimir!  
Amuno naka akwap ka aiyalama da...

Kwana ketuluritos akwesiwok, kayoikisi oni ekokoro loetupakini.  
Koyanga Ekiror loka Yesu ka jo,  
Kwape ebuku kotoma nginiruja;  
Naetukunotor acoduneta alukakin jo,  
Bon kiyengu Ekiror ngol kotoma ailip.  
Ekiror loketiai, (Ekiror loketiai!)  
O epone loejjimir! (O epone loejjimir!)  
Amuno naka akwap ka aiyalama naka Akuj;  
Ekiror loketiai, O epone loejjimir!  
Amuno naka akwap ka aiyalama naka Akuj;

117 Kede akwesiwok ituluritari kwana, ido kitauon wok nepepe kangin, kede kaijen na ebe abala Yesu, "Yeniirari Akakiro ka aiyuun da Ngol lokejukuni Eong, ejaas kAijar naka Ikar Kere ido mam elomari toma atubokinio, konye atubor anyoun katwanare aloma toma Aijar." Kajenete ebe oni, kanuka asianut naka Edeke, kirumit ngun kotoma atorub wok; kede aijaikina mamaKeng atupuruc na, ebe ebuni aijarawok aijulakin, ameun kapaaran kana kiton, ebe kiraun isio lukiyatakini acamun kotoma aomoom kosi. Kiponi oni aitam aijar kotoma ajijim ngin ka aitasiono, ebe, aiyuun ebe ngun nukilipi oni Edeke, einakini Edeke ngun mam ejai ice kanginice. Ido mam oni kinera nukarokok asurokinitor yenice, arai da itunganan idio. Kilosi oni ailipanakin lukasurupowok ido kaminasi kes, keswamanakinete nukajokak mama ejaas luiswamanakinete oni nukarokok. Edeke nges erai Ekatabon loka ingai edolit ido ingai ibucarit.

Kabwoetai kana, ido kolurete akwesiwok, Alosi eong ailip opaperowok lokajokan, Onac Lee Vayle, arai ti ngesi kotwara itunga kede akirot naka ailip. Onac Vayle.



[www.messagehub.info](http://www.messagehub.info)

Nuelimonokinit

**William Marrion Branham**

"... toma apaarasia nuka eporoto..." Apuk. 10:7